



# Vishwa Vani Samarpan

De tordong agarbertenanji amanraji apsele bo tanamyem dage aganadlam beran

Rs. 10/- | Vol. 10 - Issue 3 | March 2024



## BANGSA ANOBLINGAN

U'AN AMANENGLINGAN ?  
ANGAN AYAMLINGAN OPUNBEN DETI ?

Anin a On  
Jisun a mihaman  
kuddub  
pintun saring  
abmaridatalen.

1 Jon 1:7



**PUBLICATION OFFICE:**

1-10-28/247, Anandapuram, Kushaiguda,  
ECIL Post, Hyderabad. Ph: 040-27125557.  
Email: samarpan@vishwavani.org

**ADMIN. OFFICE:**

20, Raghul Street, T.M.P. Nagar, Pudur,  
Ambattur, Chennai-600053.  
Ph: 044-26869200.  
Email: vishwavaninet@vishwavani.org

Vishwa Vani Samarpan Kanbolan  
Dajenganti Lang Langan Batte Gabadilan Dele.  
Soura, Odia, Hindi, Marati,  
Kannada, Telugu, Gujarati, Bengali, English, Tamil,  
Malayalam, Kokborok  
Kan Asan Jaban Anlen Kitungan Aganugun  
Asan Bo Minhum Ligan Rs. 100/- Ajiba asintaben.



**Bharoto disalinglen anabsitan  
adelen agorjangba  
Jisu kristun  
arwbmangbaran agjyba.**

**Anardong beranji**

- 02 *Asusuna beran*  
03 *Anabumeng bamar saring*  
07 *Bo ansa dagz beranan*  
13 *Rajalinglen a bamar saring*  
16 *Abmang-godmar amang saring*  
20 *Hented bindo Kristun...*  
22 *Garber Ompu bamar saring*  
25 *Jannonganji abernan*

**Asusuna  
Beran**

- \* Bangsa anobling bara ligan Kan ati mandrengana apsele tungna dagi daku Sanabyun asan handraman, Bogad anlenji rabang labenden Eteden tanurtuman deti 30, 60, 100 tarding deti.
- \* Angante anlen hanan ligan dakulangten antate anardun addee Antate bangsa anobling bara maranji a ahanagoadan na Angante imalam aranji amang arduben asan ogaltabe Antate manarid dinnan apsele Abmang hanagod ligan Ranukunji ganutulan deli Anabagu hanagodan ayam ligan anappaiyan asan Abmang ayam ligan Jangardan batte anabhanan dakuli Mandra dagi anojorayan deli.
- \* Bara maran a hanagod ligan Ruang ligan anabanjangan batte Bogad antate banda labinden anlenji singo kidan adanisam ligan dakulangtin(1 Raja Kambolan 13 ligan kinolba).
- \* Uan a maneng ligan opungben deti? Pillip ambarij Uante amanengban Marid jangardan batte tanangoran delangten, Dajing ayam anlenji opungtabe? Pilip ambarij Dajing ayam sikoija marid jangardan tangor langten!
- \* Ninebi gardan angante darungyungsen ligan dakuli Bogad anlen barubyngsen yerabenden, Bara maran anin kanunduman deti Angante anin lingten anin Ayon a kampung ligan ganijtan deti!
- \* Ranuku ligan Angante bangsa anoblingan aunte, Tanondanji manarangan deti Arosengi kanalkalanji manarangan deti!
- \* Bogad mandranji lanugud ligan dakulinjiden, Panwangban yerben deti Eteden bara maran a mukan panaledan deti!
- \* Gamangtungan sanangan Adrien sikoija Bangsa anoblingan opungben asan Anlenji turdumben deti Aboija sanangan ranin debin asan Jinglenji batte hanagodanji pargardaban ambarij yernaben asan!
- \* Butenti ganudingan deli Aninji uante a dara kuna ligan yerben asan ganudingan hangleji Eteden kuni ligan togin daku Ruangan saring Aroseng dagi dakuti mole sedbzn asan!

# ANBUMENG ABMANGOD BARAMAR SARING



Taniyemdam Bangsa anobling Buhang henji

Gamangtungan Jisu Kristun ahim ringan butente anlenji asan panopon dele bar anin batte sanabyun a hang laben amandanji Limtaben

## **Ayaman a irganalamam**

Paulon bangsa anoblingan Aria Baru ringan opungeten. Ateng mandranji a dernadji bar dajingante ate anin adong pdwyengbere gamleji. Anlen kinol tabe kani kani tanangandanji apsele. (Anappai 17:16-34). Bindo dajing mandranji anin ampara mailen derremji. Aninji amang ringan Aria bwr mar Dianusia ahiman do Damari ahiman bo insalon, bar aninji Ruang ringan a parjanji danisaman hangleji. Paulon barij j'en batte opungetenji uante anlenji agalanbe er galam dagi delengten, bar anlenji ayam ban arduaibe abyarj'enaben asan.

Bar anin antate opungetin angante anlenji adernabe kun ayam ringan anlenji banidsaran hangtabe. Kitungan a d'ong saijteji, gamle kan gadele, yante gamle aninji Anin a d'ong sumle sumle saijteji do rapti hangteji pedde, dele janag a jardin na mang-ling-len buteja amang saring anin sangai ted (Amappai 17:27). Antate Kitungan ayaman tiyaiten Anin ad'ong jaben asan Jisun temang ling-len adam daku (Rumi 10:9-10, Anappai 16:31).

## **Asuyum Ayaman.**

Anlenji asuyuman batte basule daku antate Kitungan tiyaiten, anlen anopungan delai bangsa anobling ringan dernaben asan pintlenji saring tanadin hangben asan. Anlenji anabkililan hanglabi ugar lamad abmeben asan bar Jisun ad'ong radu hamben asan. Angante Jisun amang dertenbe bar pintu godlenji saring abyarjetenbe er-bangsa godan saring atteden anenji tanamadan hangtabe.

Anlenji Kitungan A'on danegodan hangtabe. Bar Ruang ringan a mn'oihan hangtabe. Asuyuman ayam ringan Ninebi gardan Tung mad gijmaran Junas batte ganadlanan deli junas gametin bar okij 40 dinna daku abyarj'enaben asan. Kanu ringan surda anabkililberan dakuli kun ambarij anlenji Kitungan a berna amdang labe bar abyarjenaba etteden tabme mandrenganan hangtabe

(Jirimiyo 5:1,31:34, 33:8,50:20).

## **Samanangan apsele sagaldamna ayaman.**

Angante anlen susutabe Kitungan anogandi ringan basuben asan, etteden Jisayo 58:6-14 ringan ambarij “ Gamangtungan d'ongben dile tordong tangorte, kan ate lumlenden tan'arben tagaldam ambarij puangte do sanamang-ben bzya dungte, ranoitad-ben mukaba-ben yerte, do Gamangtungan a gangun s'ong-ben sandungte(Jisayo 58:8).

Mandrengna len banandan dete (Jirimiya 33:6-16) ringan gamte pintulenji asuyuman batte tanamadan dete. Bar anlen d'ong ringan bar Jangarda ringan sanamangan hangtabe. Jaba anlen a ogandiba, mang len saring yante gamle buteja sanabyun apangeji kun apsele ogandineti. Anlen sanitanji hangtabe ateng, bar Gamangtungan a ganugun batte basule dakutenbe.

## **Hen buten aboi Kristu mar dean dele? Anogandi Bara henji iten daku?**

Anlen galamle raptitabe bo sakkai Kristu maran a hanagodan.

## **Barkudan:**

Rumi 3:23 sanle iten asan gamlenden iteja anansa ten, gamlenden kudub mandranji pintun lumleji bar Kitungan a ganugun panimengan amangban er-ardulabe g'ungleji, jisu Kristun kanuban dele arakadang lingan(1Jon 1:7-9) bar a janati mihaman laetin(Ebri 9:11-15). Ordar mandranji as'ong pintun saring abluben asan , anta a mandra tabme manf-drengnan hangte Jisun batte papuran ate s'zde do gijba tabmeate gadele(2Korintia 5:17). Tabme mandrengnan arabsujian !

## **Jangarda Lingan J'odagi Mandrengnan:**

Tabme mandrengnan antate Jisun batte asusuna lingan. Anlenji oganditabe biggarda god lingan marang naben asan barateng j'on joben asan. Galati 5:22,23 limgan gamte bindo Jangardan a j'on tanimyeman, man'oihan, sanabyun, ateng ayam sanaiyen banangsan, dernan, kan a kudub J'onji mang linglen adakuben det. Kristu maran Baibolan a kinolben dete dile tordong bar garbernaben dete. Marangnaben asan. Iten asan gamlenden bogad kan kuduban mang-ling-ben dakulenden do abatenglenden, Gamangtung-len Jisu Kristun a ganalam lingan s'ong-ben batuadage orde er j'oge a deben asan antate adnabme-e. (2Pitor 1;5-8).

## **Jangardan Apsele Bara Maranji:**

Butente pwardan rabrabte anin banudidam. Karahid ban a yertenji a mandraji ad'ong dangraba; bar dajing mandranji togin saring a tablen ambarij rabraba, bogad amben agamte “ anlen iteja agalamai kaniji apsele” amben agalame po buten d'ongben dangrabte? Dajing dalgadj'e maranji ad'ong abdernaba (Bh 11:30,24,11,12,juda 22). Iten asan gamlenden bogad hen bangsa anoblingan oblenglaiaden antate hen apsele kinsam a garamgaman ted, gamlenden antate a jardin na a lumben detih na do bogad hen bangsa anoblingan adnolenglaienden hen apsele ugai, iten asan gamlenden bogad kanate itsum-hen batte lumlaienden badin hangtai badih. Bindo bogad antate er itsumlabe lumlaienden d'ong-hen bo gangkil danegodan anabtengan delen asan lumtai (2 Korintia 9:16-17).

## **Sanaij saij maranji ad'ong tiybaji:**

Kuni lingan ateng mandranji daku manan d'ong dagi do Jangarda dagi sanaij saij maranji yaryar maneng lingan dakuji. Aninji barij darakuna lingan dakuji uante amaneng lingan anardun adead. Mangben a dakun a mandraji adong sayambaji bar abgugubaji. Tiridsinaba aninji adong sayamben asan. Ruang lingan bitiben turtumben asan. Kuni lingan sanitanji daku Jisun batte ordar lingan bar mandrengnan a tiki.

## **Sakkin Kristu mandrengnan na:**

Deli janangdener dalgad labi todanji batte reben dete bar pingbaben dete Jisun ad'ong. Mandrengna ling nam Jisun a dakuben dete bar antate Jisun na sakkaj Kitungan gamle apungeben dete. Kristu mandrengnan banangsadam gamle anurdagi. Sing birinda lingan bar kudub maneng lingan etteden ateng mandranji Jisun adong jateji Jisun na ablumr-hen gamle. Bar sakkin batte. Anlenji panaledan na lanugud lingan a dakunji a mandraji apsele. Anlenji basedan na mandranji adong abluben asan pintun saring. Jardin na Jisun na ameng Kitung len bar anlenji anin a sakki maranji na (Anappai 26:15-20).

## **Amen ompu lingan anumengan:**

*Barij ordaran saring Tamil Kristu soba Ganangkilan.*

600 kristu maranji manan Tamil nadu saring bar bangsa anobling bara maranji rukunjenji abmang tara manan January 14-16-2024 , manan Emil Annan Dhyana Nilayam Hyderabad lingan. Anlen bangsa ayaman ahang lai maina tanurdu garberanaben asan. bar bangsa royongan a hanglai bangsa anobling baranji a manarangan apsele. Hanangan dakuli: Anin sagalte butente Anin ad'ong jateji” 9Naumo 1:7). Anlen a sentaiji ayengana mandraji kani ganangkilan oskaileji banangsa lingan.



## **Manipur lingan sanayam baranji:**

Anlenji bangsa royongan a hanglai bangsa anobling bara maranji atemang arduben asan january 17-23 sikolija. Anlen bangsa anobling bara maranji amang adrule tany beranji batte babybenji asan. Girja sing ban adrule uante a manengban ranrdayan dele tanunjengan adnang. Bar kristu maranji adong babyeben asan bangsa anoblingan batte, janabanji batte sanayam baranji anlenji a lumlai sanaij saij maranji atemangba. Baptist ranuku lingan Kitungan ad'ong a gangkilai. Anlenji Vishwa Vanin atanal madan apsele ranuku lingan sakkin atilylai. Bangsa anoblingan batte manarangan deben asan. Garberan batte. Bar anlenji sanayamanji sanaij saij daku. Abasuyum gamle



garberba bar ganutulan Girja singanji apsele.

## **Tanal madan apsele soba ganangkilanji:**

Ompulen tanalmadan batte bangsa anoblingan aopungben dete manan bangsa anobling ompun, tanurdu maranji, Rnuku lingan abmangod maranji arukunan batte abarduben dete, kan ate surda sanita baranji na, hen semtai kudub garber ompunji ad'ong bar butente kani apsele baralenji, abasuyem gamle garberba 1400 mandranji ad'ong bangsa anoblingan apsele talim yanyanji daku yante gamle anojorayan dete kun apsele garberba ayengan a mandranji swrpzdamlenji manan 700gorjang lingan bangsa anoblingan opungben asan. Kani ganangkilani April 2024 abmang palli lingan lumben asan royongan daku. Garberba anojorayan asan.

## **Darungyung seng Barotho saring Bangsa anobling abmangod maranji apsele Talim hangnan.**

105 Vishwa Vani abmangod dane bara maranji manan Darungyung seng Barotho dissan saring talim hangna ban ardu laiji antate lanuman dele Bhopal lingan- Madhya Pradesh lingan January 28-31 sikolija bar kuni lingan bangsa sanitanji dele. Kitungan a berna opungben asan bangsa royongan a hanglai bar January 28 addiara lingan ateng ranuku lingan ganangkilan lumben asan tanalmadan dakuli, anlen Gupa maranji, Abmangod maranji,



ad'ong a sentaiji aninji bangsa royongan atiyelenanji asan a setaiji, kanate tanalmadlen daku 46000 gorjang lingan bangsa anoblingan batte arduben asan. Nami dinna lingan ateng tanunjenganji daku, anten asan garberba kan baranji anojorayan deben asan.

### **Bangsa anobling baramaranji apsele Talim Hangnanji**

25 tabme ezra maranji talim hangna lingan dakuji manan dakuji January 5 tarikon saring bar 20 Ezra Talim hangna maranji February 3 tariko lingan sanusun dete manan Gujarat lingan. Ezra darakunan apsele tabme bangsa anobling bara maranji batte manelgijan dele darunyung do barubyung Barotho dissa lingan. Abmangod naiba kani baranji sayamben asan tabme gorjanganji apsele Rs. 4000/- dile angaij lingan taniytiyanji abarduben asan sing birindan saring orde ompunji saring. Bar amben janang daraku lebu box a hangte manglen saring 10 tangga dile dinna lingan bar sayam lenba. Gamangtungan manarang lingan absetabente.



### **Bangsa anobling darakuna lingan bangsa Man'oih Abduran 2024**

Bangsa anobling abdur ganangkilan lanuman dete manan february 4 tarikon saring March 3 tarikon sikoija lanuman dete. Abmangkud kristu maranji maina tanurdu lingan arduben dete bangsa anobling bara lingan bar sanayamanji batte arduben dete man'oihanbatte. Kani ansadagi taniytiyanji batte manarangan adeben dete kani ganangkil abdur lingan. Bangsa anobling bara maranji yante gamle handrangdagi deteji Jangardanji labamben asan. Bogad Kitungan kani bangsa baranji lumben asanden adam ben adakun a bangsa anobling bara maranji ad'ong gadlambaji kani sanayam baranji abarduben asan.



### **Sanayam Baranji anabardun miyhuman March 31 Anoblorayan.**

Kani sanayam miyhumlingan aabojorayben dete March 31 adnang. Anlenji dane birdaran pangle lumben dete anoskai bara ganabri lingan. Labyu garberle a gadlamben Tanurtum box benji pangaiba, panusi gorjanganji apsele bar ansadagi taniytiyanji march 31 endrang de'en abmang abrduaiba. Bogad darakunaben saring biggarda delenden abasuyem gamle gadlamben iten asan a gamlenden mangbaben Samarpan magazine appaiben asan anlenji apsele sanayam dagi detelen. Kudub bangsa anobling baranji asan appaiyaba bar mandranji yeraiteji do garberba.

Gamangtungan sanita lingan madrangbente.

*Aman tagaldan Jabmolan bwda do oruban s'inam dangdangdong. Iten asan gamlenden kanate orde kunate bangsa dete, orde bagun sarigoji bangsa dete gamle antate aman aggalame (Hanangber 11:6)*

12.02.2024  
Chennai

Kristu Lingan Buhangben  
Rev. Dr. W.Wilson Gnana Kumar

## **Gamanglungan Jisu Kristun a Bangsa Anoblingan Uan a maneng lingan ? Angan a opungben deti?**

E Timyim maranji anlen kinoltabe Luko 10:2

Anten asan Anin aninji a d'ong gametin, jarditen na gamle agale-saran ateng bindo bara maranji asui, Anten asan agale-saran a Gamangan amang garberba, yante gamle Anin a gale janongban bara maranji a d'ong appaite.

Etteden ateng birindanji daku ordar lingan satta bagu karur

(Nami barij mandranji a danisam Punjab lingan satta 21/2 karur daku) kani karda lingan opungte sakkai danisaman gijben asan gadlamte mandranji do bangsa anobling bara maranji, Aparmangtan 6:1 gamte Ayengan ayam lingan ordar lingan mandranji a danisaman a manarangan a susunan dele, doaninji ateng insalo-onanji karukudan dele.

Kani ardong beranji saring galamtabe yan gamle pintun janang manarangan dele! Ku ayamanji na ambarij angante manarangan dele, Hanangna maranji janang manarangan dele, mandranji a manarangan ambarij na,

Anappai 6:1 Bar antadnang Hanangna maranji a danisaman atenglen adnang, mandranji a manarangan ambarij, Baibolan sanusun deli antate kuni lingan Hanangna maranji manarangan dele ordar lingan.

12 Hanangna maranji (Luko 6:13), atiki 70 Hanangna maranji (Luko 10:1), antadnang kudub Hanangna maranji maiyan maile Tudru kurdi danisaman dele, anta tiki Uan Hanangna maranji manarangan dele- jardin na Hanangna maranji ateng er-danisamge manarangan dele! Bindo angante kudub mandranji adanisaman tunjinglabenden bara maranji asuijam gamle Jisun opungetin.

Anin antate a gamad kuni lingan rondun daku gamle, itinten asan gamlenden ayengan a mandraji opungteji bogad aninji adnopunglenjiden, arenganji ganudingan dete opungben asan, Bernan a galamenji a jontunji antate bernan opungteji. Mandranji bangsa anobling baranji lumben asan danen daku mandrengnan hangben asan. Ateng agale saran tartumben asan daku bari ordar lingan. 1803 A.D Ayam lingan

ThomaS Malthus England saring aboi anidol beranji amdungetin yan gamle mandran ganirsayan deti ordar lingan kudub mandranji maian maile, anin a tungmad gij beranji ambarij kan ati atam manelgijan ambarij antate Malthus Buya mar bar Hang hang mar England Ranuku lingan. Mandranji a manarangan do bairan saring a yertaianji, anin gametin kun ayam lingan saring nami sikoija garam gamanji daku.

Abmang lingan barij ordar lingan mandranji a danisamanji er-ranaptidagi daku. Bar malthus gametin kani a garamgaman barij ordar lingan mandran a danisaman er danisam dagi marangle yerte 1,2,4,8,16,32 kan danisaman ambarij manarangan dete,

### Anabbagu lingan

Ganagan anamdungan manarangan dete danisamgi antate Malthus gameten. Kan a garam gaman ganaga janabanji manarangan deti 1,2,3,4,5,6 mandranji manarangan dete kani ordar lingan, bindo ganagan janabanji manarangan ade'e hadab logi kan ate Malthus gametin kani lingan ateng ganaga janabanji do gada nabin asan er tuladagi deti banalaian batte.

### Jisun iten gameten Luko 10:2?

Lingan agale saran ateng bindo bara maranji asui, Jisun gametin bara maranji janang manarangan dete

Jisun gameten ordar lingan mandranji ateng ganirsayan dete er danisam dagi, Nami 3 mandra karukunan dele 2 sekend ordar lingan. Kani a garam gaman ordar lingan 1 gonta 11000 passijanji karukudan deti. Bar bo dinna lingan 2,55,000 ameng maranji danisaman deti kani ordar lingan.

Barotho dissa lingan satta passijanji satta 1.25 bo second lingan bo minut lingan 48 passijanji mainan deti bar bo miyhum lingan 1 karur 53 ajar deti (1,53,000) kan ambarij ateng mandranji manarangan dete kani ordar lingan.

Aparamangtan kambol 6 lingan gamte kuni lingan ateng pintu ganir sayan do ganijmadan daku gamle opungte mandranji manarangan detin asan anlenji sakinaben deti. Pintun, Banalaian, er tulanji apsele. Kani ati na Jisun itente apsele gametin manan ateng agale saranji daku kani ate na mandrengna lingan ateng sanaij saij daku bangsa anobling baranji batte!

Uan a maneng lingan anlenji opungben dete bangsa anoblingan, angan anlenji opungben dete angsa anoblingan a murda baranji, bangsa anoblingan Jisun na! bangsa anobling baranji Marid Jangardan na!

Nami uan amaneng lingan bar uan anlenji opungb dete, aogalben deti Marid jangardan batte anlenji aogandiben deti bar garberna lingan a dakuben deti amadalenji batte bar jaru anogalanji batte labduij babnaben deti Kitungan atimang ban.

Kuni lingan mandran apsele bagu ganudingodan daku manan aboi bangsa anobling baran bar anabagu Tangka batte, kani ordar lingan ganangkilan lumben asan dakulinden Sarkar dane maranji batte lumben deti. Bindo anlenji bangsa anobling baranji do Kitungan a rajam gutulben asan delinden Marid jangardan sadle lumle araptebe.

Bogad anlenji lumlabenden, er-marid jangardan yertai amanganji saring bar aninji a bara darakunanji saring aninji gamteji anlen Jisun adong agalamtai, paulon adong agalamtai bondo aman buten? Bar atanakud



lingan kuni lingan danalgadan do arbadin dakute, bar kun lingan banantongan do dayargudnan dakute. Luko 10:2 lingan gamte Gamangan amang garberba, yante gamle Anin a gale janongban bara maranji ad'ong appaite. Bangsa garamgamanji batte appaiben asan. Gamangtungan a saneda handramgi, anin yante gamle sing lingan anin er dakulenbe bara dara kuna ban yerte,

Bindo bangsa royonganji batte sanaij saij darakuna lingan ayengan a mandranji Gamangtungan batte sanedan do era-ahid mandrengnan batte ganudingan deliji, ayengan a mandraji Lua neban ranabangan deli aninji ad'ong hanangkililan beranji taniyan deli do anappaian deli Paron atimangban (Hanagod 3).

Anin gameten "hen passij" gamle opungeten, anin ayangan a kumpunglingan anin ad'ong sedaeten mandranji amang yerben asan(Jirimiyo 1). Angan appaiben deti? bar uan appaibende?.

Marid Jangardan batte anogalan dele po orde banaihan batte po gamneti Kitung hen tedne daku etteden Anin donglen appai langten. Bogad anlenji yerben asan biggarda janalangan batte gamlabenden maniben asan, eliyو adong Kitungan Kakan batte janumjuman apangtiyle rujumetin.

Junas adong balamantaman batte anappaian deli Ninebi garda lingan Kitungan a berna opungben asan Gamangtungan mandranji a ugar lingan rietin bar mandranji abyarjelinji. Bangsa anobling baranji Ranukun do Ompunji batte lanuman ade'e ordar lingan mandranji a ranaptin batte orde Tangkan a ranaptin batte.

Bangsa anobling baranji Ruangan ati bar Ruang lingan lanuman deti. Bogad Marid Jangardan mang lingnam gakulenden – ordar mandranji atemang lingan garbnetinden bar murda dagi birdaran galdamnetiden baranji apsele abojorayben asan.

Stipan janaboban deli joar boijanji ad'ong sayamben asan bindo Gamangtungan anogalan batte Stipan ad'ong anappaian deli banabyen tiyben asan bar bangsa anoblingan gadlamben asan ante saring anin dayaraitai. Kan ati marid jangarda Stipn adong tangoreten! Pilip samaria lingan tanabgijan deli.

Atiki Jirusalem lingan dayaraiten,

Anin adong ganalaman deli yerben asan kun lingan Anin apsele bara naben asan. Anin danardin hangetin antanabai maran adong bangsa anoblingan abagandludben asan bar Tabubdaben asan kudub Marid Jangardan batte!

Angante Pitor Jopa lingan dakunetin kornelios asing lingaban ardueten marid Jangardan batte Paulon do a ompunji ampara Asia desaban arduetin pargiya, Galatia, Malesia, bar Bitaniya lingan dakulinji, bar taniy beranji bangsa anoblingan apsele tuladagi dakuli. Yurop lingan ganben asan(Anappai 16),

## Marid jangardan gameten!

Kan ati taniy beran daku bangsa anoblingan opungben asan

Marid Jangardan manglinglen dakuten uante a maneng linga bangsa anoblingan opungtabe

Marid Jangardan manglen dakuten bar opungte. Uante bangsa anoblingan opungtabe,

Kuni lingan dinnan ayaman daku bar togal ayaman daku bangsa anobling baranji apsele

Kuni lingan ranin daku bar aningadan dete bangsa anobling baranji apsele, kuni lingan mandranji a ugar lingan ranin daku bar darda ugaranji daku.

Anin a baranji apsele anlenji lumben deti butente dong hen appaihten; oruban arduaiten.

Angante bo mandra janang bara lin araptie(Jon 9:4) iten gamte kani karda lingan?

Kan ate gamte angante bangsa anoblingan apsele yan gamle lanuman dete

Kani karda lingan gamlangten lumben deti kani dinna lingan!

Dinnan ayaman daku kani ordar lingan angante bittin batte radu daku!

Amandaman bandaben deti dinna lingan tiyben asan bangsa anobling baranji apsele!

Bara maranji kani royonganji angaja adnabsedaji

Paulon paled logi gamte 2 Timoti 2,3 tanub lingan

Kristu maranji do Bara maranji apsele royongan daku omdaben asan

Jolda hanang maranji batte bar ordaranji a garamgamanji batte

Sinemanji, bar maina tanurdunji gardingji batte.

Saninken 104:23 lingan gamte “mandran dunglen, a baran lumte, do sadlumyungan sikoija barate”

Bindo Luko 16 lingan gamte orublen atiki bar togalan takudlen atiki gamangan kalaibelaigi dete bangsa anobling baranji apsele.

Bar anin gameten e uang yante gamle u'a hen a singban Lajar ad'ong aman appaite kun apsele hen garbertam. Itin asan gamlenden monloi buhang henji daku do yante gamle aninji janang kan anasudan adarakunaban adniyaiji, kun asan Lajar aninji ad'ong uailogi sakin rapti tiyte. Anin kinorayan saring royongan garte ordar lingan bangsa anobling baranji apsele ruang lingan royongan garte!

Anin dinnan do ayaman hangeten, anin kudub bittin danen hangeten,

Ordar lingan ganamangodan hangeten,

Angante dinnan arduaiten anin do a sing birindanji Ruangan apsele angaja

adnogandiadj!

Nami togalan arduiten manan kinoray ringan Aninji ramdajelinji bar edalinji gudalenji Kitung hen ayaman do dinnanji asangin absedlai

**Anin alding j'en batte anin edalin gameten Abram atimangban –**

Bindo aninjanalangan ahangad! Anin a garberan janajan ade'ad anumrengan dele. Kuni ringan aldingje maranji a ugaranan anabgugun ade'e!

Kuni ringan jorod amadanji apsele anogalan adakue.!

**Anganti anlen Bagsa aboling baran Lumtabe saletin Marid Jangardan hang hanglantin.**

Anlen yan gamle luntabe kani er-marid dinna ringan?

Angante anlen dongben a gudingtai Dile ayamlingan baranji lumben asan, Angante hananghangan detam Brara gorjanganji apsele bar bara maranji ad'ong sayamben asan – kan ati luma

Kanalkal dinnanji do miyhumanji kuni ringan hen abm'oihih gamle aman endrangan gamen abmang, aman a danggarda ayam ringan baran luma (Hanangber 12:1)

D'onglenji ordaran a durdisol lengan maiynen adnang bar Jangardan Kitungan amang endrang yeren adnang ganabdil maran Ad'ong gankilben dete(Hanangber 12:7).

Paulon gamte, iten asan gamlenden anabj'oge baran a lumben asan l'angdam sanange royongan hen apsele ranzn dele, bar asangem maranji ateng daku(1Korintia 16:9).

Ayengan a mandraji asangem ringan yerteji kun a mandranji atemang ringan ted

Bindo ayengante a mandranji a mang ringan Marid Jangardan batte a ugaranji ranzn dele

Anogandi hen ganabrin dele Mandranji a ranabten deli janangden bar yeraiten janangden itente Marid Jangardan opungte antate anogal hen daku gamle Paulon gamte

**Dinna Ayamanji-** mandrengnan a nabhanan dete, jandrumanji kandar d'onganji D'ong dagi a tanulanji batte bangsa anobling bara ringan arduben asan

**Sanangan Ranzn-** Gamangtungan mandranji atemang ringan arapsuijan abme'etin manan mandranji a ompu ringan Rajam ringan, Jilla ringan bar Gorjang ringan.

Uante a maneng ringan Marid Jangardan batte hananghangan delangten – kun amaneng ringan.

**Angan Marid Jangardan hanglangten –**

Etteden Gamangtungan a bernan atanakud sing ringan!

Dane maranji a bernan atanakud Dissa lingan dakute!  
 Bangsa anobling bara lingan  
 Marid Jangardan a berna atanakud beran.  
 Butente kani a bernanji dangdangte anin mengle a raptie.  
 Butente kun a bernan manite sanzdan rapti ade'e Haman ambarij  
 Aninji ad'ong hanamhaman ade'eji Sanbalat bar Thobia!  
 Togin gulji trading dinetin janangden  
 Bar aninji ad'ong sanoiyen batte kumabgi abmeben asan!  
 Aninji ad'ong Singo kidanji atimang lingan panipedan dele janangden  
 Aninji karoijo sing lingan banondin deleji janangden, bangsa anoblingan  
 angaja kanadaban rapti ade'e.  
 Tanimyemdan Buhang henji Mandranji a danisaman kani ordarlingan  
 manarangan dete bar Hanangna maranji janang manarangan dete!  
 Antate aman do hen danakun delai kani ordar lingan.  
 Antate itente a dinnan do ayaman manglen daku!  
 Dinna ayam lingan uante amaneng lingan Marid Jangardan batte  
 hananghangan delangten bangsa anoblingan opungben asan  
 Oblingbaji butinte manite kun lingan togal ayamanji adakue!  
 Kuni lingan dinna ayamanji dakute kani ordar lingan.  
 Bar angante aninji kani a ordaran umrengteji!  
 Anta a taniytiyan Ruang lingan dongnam taniyan detam! Amen!

## Bo Garberan

Kitung ayengan a o'nam Jisu Kristun kan ordar mandranji ad'ong Abluben asan Ruangan saring  
 Ayengan a mandranji Anin Ad'ong jaleji Ablumar Kitung hen gamle, aninji Marid Jangardan a sanayaman batte  
 banandan hangleji Jisun apsele opungben asan atanakud anosajian manniben asan! Sing birinda lingan  
 garberna sing gamle banandan de'eti bar Ranukun banarajan de'eti, hanangna maranji manarangan de'eti  
 mandranji ambarij!  
 Duaih suman ateng kanalkalan hangeti kudub ranaptinan batte, kudub birindanji anogandin hangetinji, kudub  
 mandardniji turdumetiji bar pingbaetiji dernan batte,! Kudub mandranji Jisun na mandrengnalen gamle  
 ogandietej!  
 Mandranji kani a ordar lingan basuetiji bar era-hid mandrengna ordar lingan!  
 Jabungdam Jisun ahim lingan Amen! ayengan a O'nam Jisu Kristun kan ordar mandranji ad'ong Abliben asan  
 Ruangan saring  
 Ayengan a mandranji Anin Ad'ong jaleji Ablumar Kitung hen gamle, aninji Marid Jangardan a sanayaman batte  
 banandan hangleji  
 Jisun apsele opungben asan atanakud anosajian manniben asan! Sing birinda lingan garberna sing gamle  
 banandan de'eti bar Ranukun banarajan de'eti, hanangna maranji manarangan de'eti mandranji ambarij!  
 Duaih suman ateng kanalkalan hangeti kudub ranaptinan batte, kudub birindanji anogandin hangetinji, kudub  
 mandardniji turdumetiji bar pingbaetiji dernan batte,! Kudub mandranji Jisun na mandrengnalen gamle  
 ogandietej!  
 Mandranji kani a ordar lingan basuetiji bar era-hid mandrengna ordar lingan!  
 Jabungdam Jisun ahim lingan Amen!



# Rajamlingan anabumeng Baramar saring

Rev. Dr. Benjamin Das

Kitungan Jisu Kristun Ahamlingan limtabin. Kan odaran umenglonge banandan dete do saniedban yerte. Do dile dinnan mandranji jisun irhanglabe karahidban yerteji. Kan ate gijan gijle anlen angoija ringlin addakunabe. Kan asan kitungan amangban turdumjinglen garbirnaben sanaisai do bangsa anoblingan a oblingben sanaisai.

Kan asan royongan irabsiedlabe kani kuni baran daku gamle irgamlabe anin abaran lumben sanaisai – Bangsa anoblingan iten? Iten asan murdadam do iten asan bangsa anoblingan jatabe ? badloyemar paula unji janalangan tiylangte. Galati 1: 6-10.

Satta Bangsa anoblingan na do kun bangsa anoblingan d'onglen rabrabte.

Ordarlingan ateng dirna godanji daku.

Ayengante amandra ardod hanangan tiyte anin apsele panadradan daku.

Ateng ayam lingan mandran mandaran abirna manile kitungan abirna ardite do bangsa anobling biran ajjae.

Angante kitungan do'nglen baite bangsa anoblingan amanibin asan, anlen pintun saring madridlangten gamle adirnaben dete. Do anin bogad aman manghen dirna gametinden anlen anin amangban dirnabin dete.

Orde aman gamte ijja hen dirtinai do d'onghen iten tiyete gamle gamtai. Bangsa anoblingan bigarda onoblingan batte arobjonglen araptibe. Bangsa anoblingan na tarda ayam tanangle daku do kani bangs anoblingan na d'ongnam ruangrajamban urungte.

## **Kan ate Kitungan abangsa anobling – Romi 1: 1**

Paulon anin daman gamte “Hen Kitungan abangsa anoblingmar” Bangsa anoblingan kitungan na susueten! Anin aparmangtan susuetin do bogad anin aparmangtan atsusuetinden, anlen anin amangban tanabruijan adeai badih.

Bangsa anoblingan anlen apsele tid. Kan ate kitungan anlen abmele lumentin. Jisu kristun batte kitungan bangsa anoblingan asan royaongan hanglabe. Angante bo mandra imdamten, anin bangsan ate sedate yante gamle anin dananraban do anablun hangte. Iten asan baibolan donglen gamte do kitungan a'ondaman kan ordarban apayaiten (Jahan 17:3).

Kan saring galamtabe do kitungan abara do anin kuduban lumte. Bangsa anoblingbiran ranukun adanelingan ted, orde mandran

aukan ted, orde iteja ompun saring ted. Antin asan anlen ameng kitungan amang dirtinbe. Do bigarda biranji ardile jisun ad'ong sandungtebe.

### **Kan ate Jisu Kristrun abangsa anobling – ii Coronti 2: 12.**

Satta Kitungan abangsa anobling anlen adlumbe, bindo jisu kristun na tarangdimar na. anin butin do iten ambrij anin amandrenngan. Kan akudub baran kana yam lingan mandranji ad'ong agadlambin sanaisai.

Bar anin sakai janardi kitungan kan ate anlen agadlamben dete do iten baibolan gamte kan ate mandranji ad'ong agadlambin dete. Jisu kristun na aboi satta tangoran itente anin karahidan saring dainan hangle ruangan yeretin do okij dayirtai kan abirna agadlambin dete. Anapai. 4:12 lingan gamte.

Kan ordarlingan bo mandra Anablun hangle araptie bindo satta bo mandra batte minan Jisu kristun batte anablun hangle raptitabe. Kan abirna anlen angante agangte ogalle arraptibe. Jon kambol lingan jisun gametin. John 14:6, "Hen tangoran , Janadrin do Mandrenngan na. anin sadle butejja u'an amangban anardue.

Baibolan gamte butente butente jisun ad'ong inrang galame anin mandrangnan adhanged. Jisun satle okij bigarda tangoran agasa mandrenngan ahangbien asan. Satta jisun batte aman ruangan yerre raptite.

Eten asan anlen bangsa anoblingan oblingtabe, iten asan misnerinji a'dong apaitabeji. Eten asan gamlenden ordaran atanakud dinna ardulai. Anten asan name ayamlingan anlen umeng loge baran alumbin detelen. Anlen bangsa anoblingan oblingtabe kan ate ordarn galamte.

### **Bangsa anoblingan barahen. – ii Timoti 2: 8.**

Atanakud dinnan ayamlingan anojaijan donglen arrabrabe, jisun satte d'ong len danrabte. Anlen sakai hanangan mandranji ad'ong oblingbin dtelen. Jisun buten, anlen buten, do anlen yan gamle dananraban hangtai. Satta jisun d'onglen rabrabte. Janardin galamlenden dele etteted bindo aman adirnabin dete. Janardi lingan adakunabin dete. Paulan gamte bangsa anoblingan barahen. Aman ublingle raptite po? .

Kan ate bangsa anoblingan kan abirnan ugarnam bandate. Baibolingan bangsa anoblingan na atarangdi biran. Kan asan anlen enga janangden agalambin dete. Kan agaramgaman irjanardin ate umrengle janardi godlingan ahanabin.

Bangsa anoblingan kitungan anosaijan yange gamle anlen anablun hangtai. Anten asan anlen enga janangden adirnabin dete.

Bangsa anoblingan kudub mandranji alumben dete. Yangte gamle bangsa anoblingan alumben dete. ■

# Bo Bangsa anobling Maran asaki beran

(Base Geera. Gamanga Sahi)

Geera Bhuyan Sahi Gamle bo Garjangan daku Jilla Gajapati. Odisha. Kan Garjang Ligan purban saring Sonum kundai purpurlingan Barijdam dakuji. Vishwa Hindu Kun Garjanglingan Basule Dakuji Kan Garjanglingan 2010 Salan Saring Bangsa Anoblingbiran susunan dele.

Deli janangden Kun Amandraji Erramdagan Ambrih Osantan Alin, Pogan, Rurdin, Karan, Sonumpurlingan Barihdam Dakuliji. Do anaganti Kun Garjangan Bangsa Anoblingbiran Susunan dele kun ayam ligan Ateng Mandranji Asangimlin-hen dilinji tamderlinhji atzdbin janang oskaidam deleji.



Binda Kitungan Adnitsumed, Agante hen Edana Ganzngrihyan batte Dakulinai kun ayam ligan Gagalina janangden Ban'en Adelih, itin asan gamlenden Kun Garjanglingan Bo Jangardanji Hangtaih Pede Gamle Anogandin Dakulih.

(Bh24:11)Ligan Kan Ambrih Birnan Daku, Karahidban Anurungan Adetenji Amandranji ad'ong Rabraba bar Kanabhidan ahangroitenji Amandranji

Ado,ng Arabrabben Asan Aman Rznklen dakudongne Bar (Judan22-23)Sikoija Kinollabinden Galamtabi Kan Asan Tamba, Togonal Kun Buhang, Tonananji Amangba Ardule Bangsa Anoblingbiran oblinglaji bar mandranji amdangleji bindo addirnedji dajingante tanamdermaraji asan banantanglingan dakuleji.

Bindo dajingante Mihum Atiki Kan Garjangan Saring Bo S'ingbirindan Tariko-14/01/2024 Minhumlingan jisun Ad'ong Ablumar-hen Gamle jaleji Kun S'ingmaranji Ahiman-

1. Gaibu Bhuyan (Minhum - 65)
2. Susanta Bhuyan (Mihum - 26)
3. Estani Bhuyan (Mihum - 22)
4. Shan Bhuyan (Mihum - 02)

Kun Unji Puradanji Apsele Garberba itin asan gamelenden kun Garjanganlingan aninji ad'ong Anabkalkallan Hangteji Kan Asan U'a kitungan Amangba Garbirba yanti Gamle. jangardalingan Marangtiji. Amen

Bangsa anobling baralingan Buhangben - *Pitara Bhuyan*

# ABMANG GODMAR AMANG SARING

Alemtaben ayengan a mandraji Samarpan Megazine dille angaij lingan kinolteji Jisun Ahiman. Tabme imnanji antate Marid Jangardan tiyinhnten kudub bangsa anobling bara ompu maranji ampara bar ameng sakkiberanji batte hen amdanglai bangsa anoblingan a ranaptin. Ugarlenji a mn'oihan, anlen kardalai dongdagi a manangan batte. Gamangtungan ad'ong Senba.

"Nallamalai" baru lingan endungle dakutenji, Kinanji, pargardabanji, saluanji, ja'adanji bar kudub jontunji! Kanate tanod lingan dakuji Nagarkurnool Jilla Telangana Rajam lingan. Aboi ompunji batte a susu lai abmang February angaij lingan 11 tariko Addiara dinna lingan Hyderabad. Anlenji abmang linai Chennampali gorjang manan Lingala Mandal lingan. Kuni lingan ateng Chenchu Kristu maranji kani gorjang lingan, anten asan Tmil Kristu maranji Girja singan gutulben asan abmangod linaije gorjang lingan. Pastor Piter Prince do aturdu boijan ampara arduleji. Kan ati bangsa sanitanji anlen a hanglai.

Hen Marid Jangardan batte anabanjangan delih kani bara lanumanji abojoray ben asan kani gorjang lingan bangsa anobling baranji apungiben asan. Buhangan Mandi Byanna 10<sup>th</sup> hangnan amtungeten. Chenchu gorjangan butente 10<sup>th</sup> hangnan amtungetin sorkr sakrin hangeten. Anin 12 miyhum baraneten. Antate 1992 adnang saring 2004 sikoija. Hanang mar baran. SirigirPadu gorjang lingan. Anin Sakkai Kitungan as'ong agalamad, anin tanadai janabanji batte managadan dele bar er-bangsa lingan abhananetin anin T.B Rugaman hangetin bar kukun batte dakunetin kun ayam lingan bangsa anoblingan Vishwa Vani ompun batte anin adong anopungan dele bar dile tordong amangban anardun dele garberan batte.

Bar anin adong ganarberan dele Bayanna sanamangan hangeten. Anin tabme ganadilan hangeten Jisun batte bar Aturdu boijan do 5 passijanji ampara tabme ganadilan deleji. Bayanna Jisun adong galamben asan royongan hangeten. Anin mandranji adong anin a imnan opungben asan itsuman daku. Bar bangsa anobling baranji asan manan 2006 adnang. Bayanna Kitungan batte hanandraman dele Kitungan batte bangsa anobling bara lingan manan Chenchu gorjang lingan.

Bayanna bangsa anoblingan a opungten a garam gaman kani manan Chintala, Madimadugu, Petralchenpetha, Laxmapuram bar Akram Bangsa anobling ompu lingan uante a maneng lingan Chenchu jatti maranji basule dakuji kuni amaneng lingan. Ayengan a madraji gasal lingan dakuji aninji amang bar er-derna maranji amang lingan bangsa anoblingan abarduben asan anin a erna guijnan dakule bar anin Ranukunji gutule dakunetin Sing birindanji Ad'ong Jisun amang lingan.

Ateng gorjang maranji Jisun amang lingan ateng man'oihan batte tangoretenji. Bayanna palidgi opungetin 163 gorjanganji bangsa anobling baranji asan survey abme'etin. Bar anin atabdong 92 gorjang lingan bangsa anobling baranji susueten. Bar nami anlenji ayengan a mandraji bangsa anobling baranji asan anappaian deteji aninji as;ong sayamben dete taniytiyanji batte bar garberben dete.

Paulon tordong Timoti adong ranuku lingan a kristu maranji adong Kitung lingan tangorben asan handrameti. Kun ambarij Bayanna nami bangsa anobling bara mar Velankanniayya Chennampalli lingan baraten uante Bayanna abmang lingan baranetin Velankanniayya 12<sup>th</sup> hangnan amtungeti bar 3 miyhum sakri baran lumetin. Anin tanadai janabanji batte



tanabrujian dele bar anin er-bangsa taramtaman batte abhanaetin anin Petrachenpenta lingan baranetin. Kani a gorjang Vishwa Vani batte bangsa anoblingan lanuman dele anin 100%Kristu mar gamle banandan hangetin. Kanate j'odagi Ranukun dele. Anin sanabyun batte tanabrujian dele gorjang maranji atemang lingan. Anin Jisun adong galamben asan royongan hangetin. Vishwa Vani Radio ganangkilanji batte bar anin Jisun adong jaeten. Atiki anin Vishwa Vani Ranuku lingan abmangod maran a dangardion sidrungetin.

Bar anin derna lingan manarangan hangeten. Anin gorjang lingan a mandranji yante gamle bangsa anoblingan batte aninji amang linga arduben asan dane birdaran pangetin. Bar anin 2008 adnang sakrin saring lulunetin. Bar anin Vishwa Vani bangsa anobling baranji susuetin 2019 adnang Chennapalli gorjang lingan. Hen atengman'oih dam daku kani ambarij a mandran a insalon do 4 passijanji asan. Manan Kituung ganangkil bara lingan adakunji asan.

Bangsa anobling baranji 30 gorjang lingan lanuman dete manan Chennapalli a manangbanji 6 chenchu bangsa anobling bara maranji batte. Chennapalli lingan Girja singan agutulai kani a maneng lingan kani abmang Girja singan. Kristu maranji a garberan Kitungan amdangetin kani baranji abojoraiben asan manan "Tamil Kristu maranji batte"



Girja singan a garutulan apsele jagan hanin deli baru lingan. Kuni lingan bo sanna tangoranji daku kuni a maneng lingan. Manan Telangana Coordinator susuetin Girja ganangkilan kuni ligan 11.02.2024. Dr. P.J.Baktha Vatsalama tanandin dele girja aganangkil lingan. Mrs. Pites Sakki beranji opungetin Kitungan a berna batte.

Pastor Prince gametin "Ranuku linglen 100 Kristu maranji

daku" ateng sakri maranji daku aninji lagadj'e maranji na aninji sanna baranji apsele lumben asan. Bindo aninji tanalmadan daku bangsa anobling baranji asan. Aninji bangsa anobling bara maranji apsele garberle dakuji. Ranuku ling len ateng ranukunji madrangben asan anogalan daku nami sikoija.

Kuni lingan ateng mandranji daku ateng ayam bara naben asan Office lingan bar Girja sing ganutul bara lingan aninji abara ayam lingan. Royongan ayam, aninji bayiran bara naben asan gardin hamle yerteji anlenji ranukunji madrangben asan itsumlenji daku uante amaneng lingan mandranji apsele sanaij saij dakuji kuni amaneng lingan arduben asan oskaidam dakuji. Anlen a sentai Peter Prince Ayya adong bar sing birindanji do Ranuku lingan Kristu maranji. Aninji Girja sing ganutul bara lingan abmangod linahenji asan manan Chennapalli Ranuku saring kan ate mandranji amang saring sanoso dagi daku bindo Kitungan amang ette ted.

Amben janag gorjanganji sayamba Ranukuji gutullben asan bar bangsa anobling bara maranji adong sayamben asan bar uante a gorjang lingan sanaij saij dakuji kuni a gorjanganji apsele.

Ayengan a mandraji s'ongnam absittateji, Hen aminji ad'ong absittatai, bar kudub birindanji sanitan hangetijji(Aparmantan 12:3)

13.02.2024

Hyderabad

Kristu lingan Buhangben

P.Selvaraj

Vishwa Vani Network Chairman

# Ayengan a mandraji Manipur apsele Timyimteji aninji Sanita Handrang maranji Na!

Vishwa Vani ompun saring Executive Director akudub Directoranji, Coordinatoranji bar bangsa anobling bara maranji Manipur apsele Kitungan a tanimyen aopunglenji a kudub mandranji aninji atarunjong lingan sanayam baranji January angaij saring 17 -23 sikoija. Aninji gorjang lingan do rabukubanji endungleji

Kristu maranji atimang, bangsa anobling bara maranji amangan bar a sing birmdanji atimang. Aninji babyeleji Jisun ahim lingan bar garberanji batte rabduleji. Kani sanna ompunji batte manan Manipur lingan januntud tana'aran ati oseng daga a sakkibernaji batte adyamadji. Aninji dile tordong gamleji aninji a mandrengnan Jisun batte bar dile tordoong garberan batte kani a sakki beranji opungle garberna lingan ayimbaji.



Kuni lanugud er-marid dinna lingan. Anlen (turdu boij hen bar yagi passij henji) iteja gaben asan adakuad bindo amadan do da'an satta dakuli. Anlen a kudub tananganjanji maddamlenji batte a gijlai. Garberanji batte satta derderna len dakuli Jisun ahim lingan garbernan batte.

Hen Gamangtungan ad'ong sentai Anin rubmang daga kanalkalnji saring donglenji dangrabetinan asan kun saring nami sikoija. Hen Vishwa Vani ompu bara maranji adong sentai dong lenji sindrin tiylenanji asan. Ggarusaijnjan bar bo angaij ganaga janabanji kudub sanayamanji asan

–Amnei Kom, Snam Kom

Sing birmda henji bagu tananganjanji batte dakuli: Jisun Ad'ong omdaben do gorjangan omdaben asan dakuli gorjang maranji batte tanidan a hanglai bar asangeman a hanglai. Kuni lingan asangeman, panwdyengan, bar danulajjan dakuli. Bindo hen angaja Jisun Ad'ong umrengben asan eraogande. Anlen angaja Kitungan a berna oblingben asan er kadabna kani kanalkal ayam lingan.

Gamangtungan asuyuman batte danangraban a hanglai. Kuni lingan buteja batte rukunanan ade'ad bindo Kitungan a berna Mobilan batte amdang lai bar dile dinna lingan Kitung ber mannan batte banabyen ahang lai. Karida dongbente Rajjam lingle sanabyun debin asan garberan batte. –Kanta Singh, Kakching,



Anlen Vishwa Vani bangsa anobling bara ompun ad'ong a sayamtai ranukulen saring. Kun lingan 20 daraku lebu box batten ranuku linglen saring.

Anlenji 6 angaij lingan tany liblenji aswrpztai Vishwa Vani bangsa anobling baranji asan. Danulajjan daku lilen janangden, vishwa Vani bagon bar ganaga kudub dongdaga sanaij saijanji asan.

Anlen Vishwa Vani bangsa anobling bara ompun ranukulenji saring a sentai

–Koite Ranukun saring

Anlen sanitan a hanglai Vishwa Vani bangsa anobling bara maranji batte. Anten asan anle Manipur Rajaman apsele a garberlai bar Vishwa Vani ompu baranji manan Daraku box pilanji batte. Kudub manengbanji janumtudanji batte kumabanji dele gorjang linglen May 3 adnang. Anlen resasijanji kaparda linglen tamedlai bar anlenji mengnaben asan a ogandilai.



Asuij ayam atiki. Sing lenji kumablangan banandan delen ati agijlai. Anlenji sanayam dara kunabanji a yerle do ganaga janabanji taniyan delilen bo tara a garagaman asan.

Sanna passijenji ateng danulajian batte edana lingan dakuliji. Anlenji arika sinji batte sing darakunalenji saring dunglin ayerali bar kudub antate Jisun jalangle opungeten, Jarditen gamle Hen opungtaben butente Hen asan bo bangsa anoblingan asan s'ingan, orde a buhangan, orde a tonanan orde a u'an orde a yangan orde a passijanji orde a jontunji umrengan umrengle.

Nam ayam lingan bo sua trading s'ingan Buhangan, Tonanan, a yanganji, passijanji, do Jontunji tanamderan batte do a tiki ayam lingan er ahidan a amndrengan adhange ettegoi buteja a mandra agassa (Marko 10:29-30). Anlen kani surda sanita handrang maranji delelen Gamangtungan Ad'ong saninsen an de'eti - *Mangneo, Saronphai*,

## JISUN NA SANABYULEN

Hen ateng jaru er-marid janabanji batte panaran hdelih antate hen gijlai bar anogalhenji, hen ateng banantongan do tanakaran battedakulih angante hen gijlai bo sua sating ateng anabkalkal maranji ayaryar dakulinji s'ingba hen 5 gontan ayam lingan May 3 tarikon adnang! Anlenji kuni sanunji saring ablunaben asan. Antate s'ing lenji soiben asan ogaleji.

Bar passijenji abkalkaleji; aninji anab yagi dangarda onhen adong kabhidleji amardu dongan szdeleji. Itedeli janagden hen anta a karahid dinnaji ogandile madlinghen amaddan batte barij tardangi dele. Hen anin apsele er ogandilabe dakulen a raptiai. Kanalkal dinna lingan. Jisun satta banabye maran. Kitungan a bernan satta sanayam len bar er-ahid mandrengna len a danerderan. Anlen a dertenai ganugu dinna lingan dangarda o'on hen ampara ranabangan deti ruang lingan.



Anlen banabyen a hanglai, garberan, bar Vishwa Vani bangsa anobling bara maranji a sanayanji batte. Ateng janabanji batte ganur ayam lingan aboi garusajina kaban ahanglai 5 mandranji apsele sanayam darakunan saring. Kan ate surda sanayaman a hanglai. Anlen a sentaiji butente donglenji sayamlilenji kanalkal dinna ayam lingan. Kitungan ganugun de'eti! -*Hatboi, Kangvai*.

# Hen-ted Bindo Kristuon - Rev. Dr. Pon Subarson

Mandrengan do PaulonAbyarjinanaboiateng a banandajinanji antate Baibol lingan daku. Itente managad tanabrujian apsele ateng mandranji. Jisu Kristun a yanarmengan bar Paulo abyarjenan jinjin murda daku Kristu derna lingan. Karahidan saring yanarmengan antate satta Kitungan batte. Kun ambarij ugar lingan janang Kitunganbatte. Kan ate Anin na butente mandranji a uggaranji bandale raptite..

Kuni lingan ateng badi beranji daku antate bagu tananganji batte ganalaman dele antate angaja kan ambarij tanagadan adead. Ganalam maranji batte bar manelgijan dele manan West do Lord Lyttelton manelgijan batte arduleji absuj ben asan kun ambarij aninji halinji bimdo aninji rabanglejijanardi lingan. Aninji Idoleji a janalanganji batte manelgijanji batte Saulon a banandajinan apsele. Saul buten? Saulon anabyarjenan iten? Jaba anle galamneti.

Angante anlenji saul apsele amdanglabe, anlen oganditabe papwr anosaij lingan a Saulo Rajan apsele. Hebri saulon saul a garamgaman Ganarber bar janalang kani ahiman oseng dakuli palestain dissa lingan. Angante saulon abyarjeneten, anlenji ogaltabe anta ahiman banandan dele paulo gamle. Bindo kan ate Rom ahiman. Kami agaramgaman "Sanna" saulo hanandraman dele manan paulo gamle aramadan Labgadamanan banandajen atiki bar Anin Kitungan batte sanedan dele bangsa anoblingan a opungben asan biggarda jatti maranji amangba. Anin janang ogaleten. Paulon ateng Baibol ganalam mar dakuli.

Anlenji ogandiben dete kani garam gamanji batteanta kudubanji apsele jugardam dagi daku mandranji amang lingan Kitungan ampara bar ranukun Jisun a mihaman batte ganutulan dele antate modan batte ganijtan dele aninji atemang lingan. Saulon Jiudi mar bar Parusi mar dakuli. Anin anosaijan hangneten bar Judinji anukan manieten. Bindo anin a dernad Jisun Messian gamle. Anin a nogalan dakuli Kristu maranji Ad'ong kabhidben asan. Anin 130 mail hanagodan batte yeretin 6 dinna sikoija Kristu maranji adong tobadle barondi sing lingan pedben asan Damaska saring Jirusalemban.

Iten asan itsum dagi kanalkalan batte Kristu maranji amang yereten? Najarita Jisun ahim lingan asangem lingan ateng ateng baran lumben detih gamle a jardin na hen ogandidamlenai (Anappai 26:13). Kani ate Jisun iten gameten Jon 16:2 lingan "Aninji d'ong-ben sanenpwrso-basingan saring amdungtabenji U'u angante d'ong-ben kabhiten adile mandran kan batte hen Kitungan a d'ong gangkila, gamle oganditeji antaayaman yertai. Kan ambarij mandranji a nogalanji arduai butente Jisun ad'ong Atimyemeji , butente Gamangtungan a berna agandludeji.

Bar aninji umengdam deteji do anogandin lingan er-daihnage deteji. Paulon gamte "bar hen er galam mar dean dele er derna lingan anta a baran lumlaian asan hen abasuyaman hanglai(1 Timoti 1:13). Paulon anindaman absannadamlen gamte kan ambarij mang lingan dakuli kaniji batte manglinglen panungen dele buten Kitungan a onanji asangem lingan yertai bar Ranukunji iten asan gamlenden aninji a er dernanji batte abaranji lumteji.

Tidne lingan saulon anogading dakuli bar damask ban yerben asan. Bindo anin Kristu maranji bar Hanangna maranji ad'ong jable a raptiad. Kitungan anin adong hameten. Anin a sanengsengan absedeten. Anin Kristu maranji adong tobadle Jirusalen ban urungben asan ogandieten bind obo mandra anin adong toolbadeten saulon abyarjeneten angante

Jisun anin adong jabeten Anin Jisun amang dermeten bar Tabubdan hangeten. Atanakud ligan anin tabme ganadilan dele.

Abmang tanagandan antate mandaran a mandrengna ligan dete ayenga a mandraji Jisun ad'ong jateji abyarj'etenji . kan ate Jisun batte. Kan a kuduban Gamangtungan Jisun batte dete kuni ligan amdranji butente dormo ligan sandungteji anosijan bar ganabri beranji er banandaj'enan batte ugar ligan. Aninji a dwrnanji banandan dete, aninji angaja anogaleji abmang do tiki apsele a mandrengna liganji. Paulon kudub banandan dele (Galati 1:23-24) satta, d'ong-hen a purban a tamderren a mandra ayengan a derna godan abs'zdeten anta bangsa anoblingan nami anin oblenkte, gamle amdangleji maih. Bar hen apsele Kitungan ad'ong abgugule abpemengleji.

Mdranji gijteji po, buten donglen gijteji, Kitungan ad'ong Senteji? Paulon a banandaj'enan order dagi ted. Kan ate tanagad ayamnaji batte ted, kan ate Kritun batte a ganudingan dele. " Hen Kristun ampara arakadang ligan kanabhidan delih dele janagden hen am'engdam. Bindo antate nam saring hen ted, osantan Kristun mang linghen dakuan dakulen mandrengnan abhanate. Bar nami d'ong ling-hen itente a mandrengnan hen abhanatenai, antate Kitungan a onan a dernan batte abhanatenai. Anin timyemlih, do hen apsele kubdamneten. (Galati 2:20). Kani atiki kan ate hen apsele ted kani ambarij anlenji gamtabe po kani bernanji batte jaba anlenji ogandile sanitan ahangle mandrengna linglen dakueti. ■

## ANABLUN HANGBA



Ateng s'ing birindan Kangra aloban basule daku, Himachal Pradesh gasal managadan batte daku. Turdu mar hen janang kuni tanadai janab ligan a managed ligan daku bar kudub anlenji apsele mogasa dele! kini ligan iteja tanurtuman adakuad sing ligan.

Anlen dile tordon rurdile adaku linai sanabyun apszdlai. Anlen aogandilai Tonaijan batte kabhidneti gamle. Bindo kun baranji apsele ateng korson dakuli.

Hen bo insalon toi toi s'ing hen saring rabang lai ateng manoi'an batte. Hen aninji a maina tanurdu ganangkil ban iyle.

Hen man'oihan hanglai ordar ligan antate hangben asan jugardamdak dakuli Baibolan batte hanglai. Hen garbernaben susulenai bar Jisun ahim ligan dernan hanglai. Gamangtungan a bernan d;ong hen banangsan abmeihten bar turdu marhen janang hen batte anin ogandieten hen okij alin agai gamle.

Nami anlen Jisun ad'ong gangkile daku Jisun a s'ing birndan dean dele bar kan ate jardin na asuyuman a dinnan na. jarditen gamle butente Jisun amang Gijgijteji aninji sanitan hangteji! Halleluya!

-Pushpa Devi Chhattar a gorjang saring

## JISUN NA ANOGANDI-HEN BAR DANERDER HEN.

Kanin na bara lanumhen daku pwdyingben asan ayengan a mdranji Baibolan hamleji bar ayengan a mandraji Jisun Ad'ong gangkileji. Hen aninji adong asangimlai bar aninji ampara rurdilenai.

Ateng asangimlaji. Aninji dong timyelihji jinjin logi. Berna hen ateng er-bangsa bara ligan ganitan dele dile dinna ligan. Bindo tanimyem baeran bangsa anobling bara maran a bernan batte ugar linghen mainan dele.

Hen Jisun a tanimyeman gijlai Kristu maranji atemang ligan Khardorhi gorjang ligan uante amaneng ligan hen basulai. Mandrengna ling hen tabme ganadilan sanusun dele (Jon 3:16) batte. Kuni ligan iteja danalgadan agasa. Buteja batte ganudingan adelih.

Hendaman batte Kristu maranji a tanurdu ligan mailenai. Jisun na banangsa hen ganijtan deli ugar ling hen kudun dangarda anogandi linghen Ameng Kitungan Aberna ligan!

- Vishal Lakra, Chhattisgarh



# NAMI GANABRI AYAMANJI NA, NAMI ANABLU DINNAN NA.

- Rev. Dr. Emmanuel, Gnanaraj, Garber Ompu anabumeng Baramar Saring.

Mandranji amang lingan ayaman agasa biggardanji apsele; aninji agalameji uan amaneng lingan dakuji bar aninji adong akadaben deti ganoji godbanji saring anablun hangbenji asan. Kuni lingan ateng anabkil kilberanji daku aramadani batte Baibol lingan antate donglenji a sayamben asan Bangsa tangor lingan hanaben asan. Abmang lingan anabkil kil beranji sanusun deli manan Edon kutta lingan aninji adong anopungan deli bogad amben ajumlenden a kahidte gamle anopungan deli kan ambarij ateng bernan batte arasuijan daku mandrengna lenji asan bar ordar mandranji apsele.

“ e anargal maranji, amben d'an adamban yeraiba; bar er leburn agasan a mandra yera, aman hia do juma! U u, iyai er leburn batte do er janattin batte drakiyadan do arduban hia. Amben itin asan er janujum janaban apsele leburn a karsote? Bar itente ban'en adde-e kun apsele aman iten asan barate? Berna-Hen kilkillen amdanga: itente bangsa antate juma do jeljel janabanji batte pwarda-nam sadyima (Jisayo 55:1-2). Amben janrumsengban orde kandrabardisengban a lartenan adhang seletten l'ud-ben kandungbaben saring kan a bernan amdangte, kani na godan; kani lingan hanaba ( Jisayo 30:21). Jisun anin ad'ong gameten Tangoran, Janardin, bar Mandrengnan Hen na Hen sadan sadle buteja U'an amangban adniyaji ( Jon 14:6). Bindo kuni lingan surda ganudingan daku (Mattiu 11:28) lingan “ E mananga do lanagin maranji, kudub-ben mangba-Hen yeraiba, do Hen ablulunataben. Aninji adong gudinte ayengan a mandranji tanakar lingan dakuji Aningudingte lulunan tiyben asan. Ayengan a mandraji sanidban yerteji er-tanurdun batte Kitungan batte pintun asan. Anablun asan ateng anoskai beranji daku. Kanalkalan saring Kitungan batte. Pintu maranji apsele maina tanurdun deben asan Jisun batte ganadilan deli. Jisun a janati mihaman laetin arakadang lingan mandranji adong tandiben asan. Anten asan bangsa maina tanurdun batte mandranji apsele tanandin deli. Kani apsele umeng baranaben deti bangsa anoblingan batte!

## Dile Tordong Garber Royong Ganangkil Baranji.

### 1. Bangsa anoblingan Sanai saji daku.

Er-kitung lingan mandranji basuteji kani ordar lingan bar augar lingani lumben asan ogalteji antate a kandar donganji batte abojorayeji. Aninji kinorayban halin yerteji. Kani asan bangsa anoblingan opungben asan sanai sajidam na tanamadan apsele bar yante gamle pintu lenji tanamadan deti. Kan ate oblingben asan murda daji daku anablugodan asangin anlen hangben asan Gamangtungan Jisu Kristun bate. Jaba anlenji a hangnaba yan gamle bo banagi maran sanayaman hangte bar anin ad'ong buten sayamte ganargaran saring. Bogad Jisun Pintunam Jisun tabmad damtenanden bar bogad aman Janibjeban bate pintunam tanabmadan delenden, eteden bara nam daku bangsa anoblingan biggardanji ad'ong a opungben apsele bara nam. Bogad butente galamle er-opung labe dakunetenden, etiden mandranji yan gamle amdangeji? Ateng mandranji er-galamlabe dakuji Jisun Ablumarhen gamle bar Jisun ad'ong adnidsumeji. Bindo Anappai 4:12 lingan gamte, Bar janang Anin sadan sadle bzgarda buteja amang lingan anablun agasa, iten asan

gamlenden anlenji anablun a hangben asan riangan a jaitan, mandranji amang lingan ednegoi bzgarda Ahiman taniyan adead. Jisun sata Anablu maran anten asan bangsa anoblingan a opungben deti bzgardanji atemang lingan. Kun ayam lingan unji mutta bzbmbzm maranji dakuleji, bar aninji didargam arberle gamleji, anlen a kahidtaian sikoi ja iten asan kan a darakuna lingan a gobgo daku? Kani ayam lingan bangsa beran na bar antate anlenji dam apsele dakutabe. Bogad anlen panunge dinna lingan banidsaran apsele turtumle dakulabe kani mutta bzbmbzm maranji anogalan dakule bar murda dagi bangsa anoblingan bzgardanji atemang opungben deti.

## 2. Bangsa anoblingan kan ati umeng a opungben sanaij saji.

Anlenji umeng bara nablen deti. Kan ate mandranji abding dingteji mandran handrangan a hangben asan umeng baranji lumte. Bindo angante anin gijte mandranji a sanaij saijan, anin ogandite sayamben asan ateng manarangan apsele. Hen yagi angaij sikoi ja darimadna lingan dakulih er-sana mang kanalkalanji asan. Bo dinna Gamangtungan tanalmadan bate Kitungan apsuijdamnetin tagaldan ayam lingan hen tamji miyhu sikoi ja Kitungan a bara lingan dakulih bar nami baranji apsele dunglen araptia. Tiyre maranji a bernan bate banantong lingan hen daku. Anten asan hen Kitungan ad'ong gamlai uan ayam adnang bangsa anobling bara lingan bar-susuai. Uan ayam susuai? Iten lumai? Kani jana langanji tang bzgarda daku bar rubmang dagi. Kitungan dong hen uale gamihten, Opungih uan amaneng lingan mandranji jangarda lingan a kahid dakuji bar kahiteji? Mandranji kudub maneng lingan kahidteji. Kitungan gametin kudub maneng lingan bangsa anobling baranji lumben deti. Mandranji namintan kahidteji. Anten asan bangsa anoblingan umeng a oblingben deti.

Jardin na Tanimyemdam buhang henji, ordar ayaryar manengban Jisun ad'ong er-hanglabi kinorayban halin yerteji! Bogad anlenji oblingben asan abardoih labinden nami er-obling labe biyo opungtai gamle ogandilabenden surda kanalkalan abmetabe. Bo dangardi anabhana boi manan America er-bangsa anabhanan bate dakuli er-sanabyun bate. Anin bo dinna royongan hangetin bangsa anobling soba lingan yerben asan. Kuni lingan Kitungan bate dile tordong ganudingan hangetin.alungje'e lingan ateng tanakaran bate dakuli kun ayam lingan. Do anin Jisun ad'ong jaben asan bangsa anogandin hangle Jisun jaetin anabiyo dinna lingan atiki soban saring yarnetin. A sing damban erardulabe tungar godlingan tanagadan bate karahidan hangetin. Jisun ad'ong a hangetin atiki. Bindo anin satid samoihan a royongan hangle a raptiad.

Jarditen gamle Taminyemdam Buhang henji, jaba a surpedamnaba Jisun amangba nami dinna lingan bar Jisun apsele bangsa anoblingan oblingneti. Gijba 2 Koronti 6:2 lingan gamte, "Iten asan gamlenden Anin gamte, "Tungna-jana arduall lingan Hen berna-nam amdanglai, do ranabrab ayam lingan Hen dardilam; Gijba nami kun tungna jana arduall daku, do nami kun ranabran ayaman na. biyo abyarje nabin asan royongan ahangbe, bindo aninji timang linglen dakuji. Saleten unji mutta bzbmbzm maranji arberle gamlleji anlen bangsa baran adlumbe. Nami bangsa anoleng dinnan bindo anlen a karding dakutenbe. Bogad anlen tagaldan a tan'aran sikoi ja omdelabenden, etteden anlen panadradan hangtabe. Kan asan nami jaba, anlen iyan iyle rajasing lingan kan a bernan oblungnete (2 Raja 7:9). Iten asan kani anogalan apangbe?.

### 3. Bangsa Anobling Bara Lingan Sanitan:

Kudub maneng lingan bangsa anoblingan a opungben deti uante a maneng lingan anlen yertabi kun lingan a opungben deti. Anten asan aninji apsele a garberben deti. Kan ate baralen bangsa anoblingan a opungben asan bar kan baranji sayamben asan. Aninji hen ampapa dajingante ahimanji turdu bara-mar-henji mandrengna kambol lingan anidan daku, aninji ampapa ja bangsa anobling lingan erreji-guijeji, ( Plippi 4:3). Kani anidol beranji bate donglen hanangan tiylangten Kristu lingan bangsa anoblingan bo anogandin deba gamle opung langten. Pilippi kambol lingan ambarij sanitalenji anidolan deti. Anlen musaldayimge addebe bindo garber lingan adarmad adakunaben deti. Jaba anlenji bangsa maina tanurdun batte bangsa anobling bara lingan a bara naba Ruang lingan ateng manoihan abmeneti bar surda mano;ihan mang linglen dakueti. ■

## Kitungan ad'ong sanen senan de-eti! Gardabanji anardun dele, Bangsa anobling bara lingan a manaranganji apsele Sakki beranji.

38 garber ompunji , anlen batte royongan a hanglai garda lingan endungben asan manan Odisha Rajam lingan Dindigul bar Tiruneveli saring. Anlen ardule January 8-18 tariko sikoija, kani murda dinna linganji bangsa anobling bara lingan tanulan a hang lai!

Ayengan a bangsa anobling bara maranji gorjang banji arduleji ateng asuyumanji batte! Kanate Marid Jangardan abarnji batte Jangardanji labamben asan bar Ranukunji madrangben asan lumte. Girja singan antate Schol shai lingan ganutulan dele Mr. John Solomon, bar Mrs Hepzibah batte Thiruselvam antate swrpzde garbereten Gamangtungan a ganugun asan 15.1.2024 tariko lingan. Gamangtungan rubmang baranji lumetin kani a maneng lingan a ganugu n apsele bangsa anobling bara maran batte. Halleluya Anin a tanurdu bara maranji a ompu saring –*Jesudas DuraiSingh, Coordinator.*



## Kun amanengban a Dissa ban saring

Anlen a sentai Rev. Dr. Rajan Edward 20 bangsa anobling bara maranji asong jabobeten asan manan Host Kristu Ranuku lingan. Tirunelveli 23.1.2024 adnang. Kani a bangsa anobling bara maranji hanagodan susuleji manan Rajastan, Hryana, Gujarat, bar Maharashtra lingan. Anlenji janang bangsa passijanji a hanglai kani bangsa anobling baranji a sanayam maranji.



Kani Ranukunji antate atanang dakuji manan Barotho Dissa lingan bar sing birindanji dile angaij lingan bangsa anobling bara maranji a sanaij saijan badrijben asan , Gamangtungan ateng sanita lingan madrangetiji. –*Coordinator*





# Jannongan Abernan

## Sanen Senan do Garberan

*Bindo Jisun aninji a d'ong gijgijle gameten, mandranji apsele kanate Jugardamdak daku.  
Bindo Kitungan apsele ette ted.*

*Iten asan gamlenden Kitungan apsele kudub baran rojoldam daku ( Marko 10:27).*

### 1. Jammu Kashmir

**Brara Jannongan:225**

Gamangtungan ad'ong saninsenan de'eti Hambel saring 5 mandra Jisu Kristun ahim lingan anablun hangleji. Gamangtungan a ganugun asan Aftab sing birindan Tanger saring Kitungan a bernan batte tabme mandrengnan hangetin. Gamangtungan ad'ong saninsenande'eti Kitungan anabanjingan batte 50 dangarda dangardin adong bangsa anoblingan anopungan deli manan Ridian lingan. Gamangtungan a ganugun asan Chand kristu asangiman saring bangsa anoblingan batte Jisun ad'ong jaetin.

Bangsa anobling baranji a manarangan apsele garberba manan Manwal lingan. Ayengan a mandraji bangsa anoblingan amdangleji aninji apsele garberba manan Gandala do Chanderkot lingan. Ayengan a mandraji bangsa anoblingan a sangim lingan yerteji kun a mandranji apsele garberbaji manan Lali gorjang lingan. Derna maranji apsele garberbaji Girja singan asanurpedan asan oskaidam dakuji.

### 2. Himachal Pradesh

**Brara Jannongan: 223**

Gamangtungan ad'ong saninsenan de'eti 180 mandranji atimang lingan bangsa anoblingan anopungan deli anumeng sobanji batte. Gamangtungan a ganugun asan sanangan ranin deli bangsa anobling baranji asan Barot gorjang lingan bar 3 mandra anablun hangleji. Gamangtungan saninsenan de'eti 10 gorjangan survey deli bangsa anoblingan asan. Gamangtungan a ganugun asan Dangardanji swrpeddamlinji bangsa anoblingan asan.

9 mandranji do sing birindanji apsele garberbaji ayengan a mandraji Jisun ad'ong jaleji kun a mandraji apsele garberbaji. Rahul Gil asu lingan daku yante gamle sanamangan hangte kun apsele garberba. 28 tabme bangsa anobling bara maranji yante gamle bangsa bara nabin asan anogandin hangteji kun apsele garberbaji – 140 gorjang lingan. Jangarda lingan yante gamle Raj Ka Bagh manarangan hangte kun apsele garberba.

### 3. Punjab

**Brara Jannongan: 268**

Gamangtungan ad'ong saninsenan de'eti 35 mandra tabne dagi girja lingan mailenanji asan. Gamanangtungan a ganugun asan 13 Jisun ad'ong sandungben asan

swrpedamlenji manan Dangarda ompunji batte. Gamangtungan ad'ong saninsenan de'eti bangsa anobling bara maran a sing manan Rasool do Jaswinder Gamangtungan asuyum taniytiyan passijan hanglenji asan. Gamangtungan a ganugun asan 20 mandra abmangod linaiji bangsa anobling baranji apsele abmangod linaji.

Ayengan a 26 mandranji Jisun ad'ong ablumar hen gamle dernan batte pingbaleji aninji apsele garberbaji yanti gamle radu tanangle raptiteji. Garberba Marid Jangardan dangardanji a uggar linganrubmang dagi baran lanuman deti kun apsele garberba 12 gorjang lingan. Ayengan a 40 mandranji dernan batte Jisun ad'ong ablumar hen gamle dernan batte pingbaleji aninji apsele garberbaji. Bangsa anobling bara maranji Sandeep do Jaspal yante gamle asu kanalkalan saring sanamangan hangben asan garberbaji.

#### 4. Uttarakhand

**Brara Jannongan: 210**

Gamangtungan ad'ong saninsenan de'eti Kitungan aberna amdangben asan ateng mandranji ateng itsuman dakun asan manan Sripur Bichwa lingan bar girja ganangkilingan. Gamangtungan a ganugun asan 4 gorjang lingan sanabyun batte banarajan deli Haridwar lingan. Gamangtungan ad'ong saninsenan de'eti Kahatma lingan tamanderna saring Jisun ad'ong timyemltenji asan. Gamangtungan a ganugun asan 145 mandranji dernan batte Jisun ad'ong ablu mar hen gamle pingbaleji bar bangsa anobling bara lingan swrpedamlinji.

Ayengan a mandraji Baibol hangna lingan mailinji manan Mudeli do Kanjabag lingan aninji apsele garberbaji. Garberba yante gamle 63 girja ompu lingan mandranji Jisun amang ateng mandranji urungle raptetaiji toi toij gardabanji panwangban. Garberba yante gamle gorjang lingan bangsa anoblingan asan gorjang lingan sanangan ranin deti kun apsele garberba. Bar yante gamle bangsa anoblingan batte manarangan deti manan 5 bangsa anobling darakuna lingan Kitungan anabanjengan batte.

#### 5. Haryana

**Brara Jannongan: 111**

Gamangtungan ad'ong saninsenan de'eti Jitendra tanadai janabanji umrengetin asan bar barij sing birindanji sanabyun batte basule daku. Gamangtungan a ganugun asan Paramjit tanangadan saring anablun hangle bar tabme mandrengnan hangetin Kitungan asuyuman batte bar anin bangsa sakiberan batte biggardanji atimang handram dagi daku. Gamangtungan ad'ong saninsenan de'eti Anchal T.B Kanalkalan saring sanamngan hangeti. Gamangtungan a ganugun asan 106 anablun hangleji Anumeng sobanji batte.

Anumna garber lingan yante gamle rubmang dagi baranji ganijtan deti kun apsele garberba manan Shaha do Kalanaur a gorjang lingan. Anablun apsele garberba Vimal do sing birindanji sanabyun saring sangaij dakunji a mandranji apsele. Dangarda ompunji apsele garberbaji manan Shergarh do Dhanod lingan. Matedi a gorjang a mandranji apsele garberbaji yante gamle Kiytungan a tanimyem lingan yanti gamle ranadun hangetji kun apsele bangsa anamdanganji asan.

#### 6. Delhi

**Brara Jannongan:11**

Gamangtungan sanisenan de'eti 4 anumeng sobanji batte tabme gorjanganji survey deli bangsa anobling baranji asan. Gamangtungan a ganugun asan Kristu derna maranji aboi Computer do Printer hangben asan itsuman dakuli Kitungan asuyum batte hanangan deli Delhi bangsa anobling dara kuna lingan. Gamangtungan ganugu panimingan de'eti Rabban, Reena, bar Jyoti asu kanalkalan saring sanamangan hangleji. Gamangtungan

a ganugun asan kudub Kiran a sing birندانji Jisun amang swrpdamlinji dernan batte.

Garberba 10 manndra oskaina lingan dakuji Jisun adong jaben asan. Ayengan a 102 mandra Baibol hangna lingan dakuji aninji yante gamle Jangarda lingan manarangan hangteji kun apsele garberbaji. Gamangtungan amang garberba yante gamle kudub ayam apsele bangsa anobling bara maran hanangan deti kun apsele garberba 6 gorjanganji asan.

### **7. Rajasthan – Babswada**

**Brara Jannongan:233**

Gamangtungan ad'ong saninsenan de'eti 13 mandranji dernan batte Jisun ad'ong pingbaleji. Gamangtungan a ganugun asan Amra sing birندان er-marid jangardani saring tanandin hangleji bar nami kristu maranji amaina lingan dakuji. Kitungan ad'ong saninsenan de'eti Shivilal tanadai janabanji umrengtin bangsa anoblingan anamdangan batte. Gamang-Kitungan a ganugun asan 5 mandra Kitungan ad'ong gangkilteji manoihan batte Uplamagra a kristu maranji ampapa.

Gulji miyhum deti Er-marid jangardan anabkalkaln saring yante gamle Sharmila tanandin hangte kun apsele garberba. 30 dangardani yante gamle bangsa Talim hangnan taniyan deti bangsa anobling baranji apsele garberba er-ardu gorjanganji apsele. Balua a gorjang lingan yante gamle anumeng soabn lanuman deti Jangardani lanabaman asan Jisun Ahim lingan. Girja ompunji yante gamle ranapten batte yante gamle anabanjangan hangteji kun apsele garberbaji Gamangtung lingan bar lanugudan batte adakunji a gorjanganji yante gamle Panwang lingan tanangoran detiji kun apsele garberba manan Kotra lingan.

### **8. Rajasthan - Udaipur**

**Brara Jannongan:192**

Gamangtungan ad'ong saninsenan de'eti 13 mandranji dernan batte Jisun ad'ong pingbaleji. Gamangtungan a ganugun asan Amra sing birندان er-marid jangardani saring tanandin hangleji bar nami kristu maranji amaina lingan dakuji. Kitungan ad'ong saninsenan de'eti Shivilal tanadai janabanji umrengtin bangsa anoblingan anamdangan batte. Gamang-Kitungan a ganugun asan 5 mandra Kitungan ad'ong gangkilteji manoihan batte Uplamagra a kristu maranji ampapa.

Gulji miyhum deti Er-marid jangardan anabkalkaln saring yante gamle Sharmila tanandin hangte kun apsele garberba. 30 dangardani yante gamle bangsa Talim hangnan taniyan deti bangsa anobling baranji apsele garberba er-ardu gorjanganji apsele. Balua a gorjang lingan yante gamle anumeng soabn lanuman deti Jangardani lanabaman asan Jisun Ahim lingan. Girja ompunji yante gamle ranapten batte yante gamle anabanjangan hangteji kun apsele garberbaji Gamangtung lingan bar lanugudan batte adakunji a gorjanganji yante gamle Panwang lingan tanangoran detiji kun apsele garberba manan Kotra lingan.

### **9. Bihar**

**Brara Jannongan:192**

Gamang-Kitungan ad'ong saninsenan de'eti 15 tabme gorjang lingan bangsa survey deli bangsa anobling baranji apsele Magahi Jati maranji amang lingan. Gamangtungan a ganugun asan Debora ompun Asuiya gorjang lingan 95 mandranji a bangsa asan sanayam baranji lumleji. Gamang-Kitungan ad'ong saninsenan de'eti anumeng sobanji batte 208 gorjang lingan 1872 mandranji adong bangsa anoblingan anopungan deli. 380 passijanji ad'ong anabsetan deli mananDaulatpur lingan. Gamangtungan ad'ong saninsenan de'eti bangsa anobling bara mar Pritam adong Gamangtungan a ranapten batte hanandraman deti.

Chhapra Jilla lingan 58 tabme gorjanganji apsele bangsa anobling bara maranji sanaij saij daku kun apsele garberba. Ayengan a 904 mandranji oskaidam dakuji derna lingan radu tanangben asan kun a mandranji apsele garberbaji. Kudub ayam lingan bangsa anobling baranji apsele garberba yante gamle dangarda ompunji saring hanangan deti manan Munger Jilla lingan. 17 gorjang lingan Girja sing baranji halin daku yante gamle anamtungan debin asan garberba. Bar Girja singan a garutul apsele yante gamle jagan hanangan rapti deti kun apsele garberba.

#### **10. Jharkhand**

**Brara Jannongan:297**

Gamangtungan ad'ong saninsenan de'eti 20 gorjang lingan bangsa anobling baranji sanusun deli. Gamangtungan a ganugun asan asangim maran Prakash Munda bangsa anoblingan gandludle Jisun ad'ong jaetin. Gmangtungan ad'ong saninsenan de'eti 15 Mundari maranji dernan batte Jisun ahum lingan pingbaleji gamangtungan a ganugun asan 130 passijanji ad'ong ganangkilan batte hananghangan deliji manan Bharmo lingan.

Jeewan Midki apsele garberba asun saring sanamangan hangben asan. Tal lingan a basutenji a mandraji yante gamle lanungudan saring panwangban anurungan detiji kun apsele garberbaji. Bar ayengan a mandraji bangsa anobling baranji apsele asangim lingan dakuji kun a mandraji apsele garberbaji abyarjenan asan. Pardeshiya a sing birindan apsele garberbaji aninji passijan hangben asan 12 miyhum deti omdile daku hangben asan.

#### **11. West Bengal – CoochBehar**

**Brara Jannongan:185**

Gamangtungan ad'ong saninsenan de'eti 26 mandra Jisun ad'ong dernan batte pingbalenji asan. Gamangtungan a ganugun asan insalonji Talim hngnan asan joinlinji manan Beldanga lingan. Gamang-Kitungan ad'ong saninsenan de'eti 390 tbme ansadagi ganangkilan batte 35 gorjang lingan lanuman deli. Gamangtungan a ganugun asan Goutam Boiragi gutulben asan royongan hangetin.

Ayengan 52 mandra rukuna lingan daku manan Sakra ompun apsele yante gamle tabme girja singan ganutulan rapti deti garberba. Shyam Pariya asu lingan daku sanamangan apsele garberba. Shyam Turdu do sing birindanji apsele garberbaji banabyen hangben asan. 4 dangardanji talim hangna lingan dakuji yante gamle amtungle bangsa anobling baran lumteji kun apsele garberbaji.

#### **12. West Bengal – Darjeeling**

**Brara Jannongan:101**

Gamangtungan Ad'ong sanisenan de'eti Meena Kumari Gamangtungan Jisu Kristun Ahim lingan berlin raptite. Gamangtungan a ganugun asan Sarita Oraon Septiguri saring a sing lingan bangsa anobling soban asan rileji. Gamangtungan ganugun de'eti bangsa anoblingan Haldigach a gorjang lingan anopungan deli. Gamangtungan a ganugun asan ateng mandranji kristu maranji a sing lingan rukulinji bar kun mandranji saring unji mandra bangsa anoblingan galamleji.

Garberba Seekers anumeng soban yante gamle anojorayan deti manan Tribal Jote a gorjang lingan. Kitungan amang garberba bangsa anobling bara maranji yanti gamle anappaiyan rapte deti manan Bharagi do Peki gorjang lingan. Tabme Abyarji kristu maranji apsele garberbaji danangraban asan. Bijay, Rinki bar sing birindanji barkudan hangben asan garberbaji.

### 13. West Bengal – Kolkata

Brara Jannongan:194

Gamangtungan ad'ong saninsenan de'eti 26 mandra Jisun ad'ong dernan batte pingbaleji asan. Gamangtungan a ganugun asan insalonji Talim hngnan asan joinlinji manan Beldanga lingan. Gamang-Kitungan ad'ong saninsenan de'eti 390 tbme ansadagi ganangkilan batte 35 gorjang lingan lanuman deli. Gamangtungan a ganugun asan Goutam Boiragi gutulben asan royongan hangetin.

Ayengan 52 mandra rukuna lingan daku manan Sakra ompun apsele yante gamle tabme girja singan ganutulan rapti deti garberba. Shyam Pariya asu lingan daku sanamangan apsele garberba. Shyam Turdu do sing birindanji apsele garberbaji banabyen hangben asan. 4 dangardanji talim hangna lingan dakuji yante gamle amtungle bangsa anobling baran lumteji kun apsele garberbaji.

### 14. Sikkim

Brara Jannongan:99

Gamangtungan ad'ong saninsenan hangeti Sangay Lepcha bar Sangita Subha sing birindanji Kitung ganalam lingan manarangan hangtenji asan. Gamangtungan a ganugun asan tabme mandranji Baibol hangna ompu lingan mailenji. Gamangtungan Ad'ong saninsenan de'eti Chungmit Lepcha sing birindanji Gamang-Kitungan Ad'ong gangkilben asan swrpzdamlenanji asan manan Kedhangthang lingan. Gamangtungan a ganugun asan Sita Thapa's sing birindanji tanamadan hangle Sudhung Lakha a Ranuku lingan mailenji.

Ayengan a 15 mandranji Jisu Kristu lingan tabme ganadilan hangleji aninji batte yante gamle ateng mandranji ad'ong Ranotad ban urungle raptitaiji kun apsele garberbaji. Suman Rasaily apsele garberba anin Kanser rugam lingan daku sanamangan apsele garberba. Samthar do Sidibung a ranukuji a sanusun apsele garberba. 5 gorjang lingan yante gamle Girja singan ganutulan debin asan yante gamle jannongan hanangan rapti deti garberba ateng mandranji manarangan deti.

### 15. Assam

Brara Jannongan: 275

Gamangtungan saninsenan de'eti tabme girja ganagkil ompun sanusun deli manan Soslabari a gorjang lingan Sntal maranji atimang lingan. Gamangtungan a ganugun asan 9 mandra missing do bodo ompun saring Jisun adong abumar hen gamle dernan batte pingbaleji. Kitungan ganugun de'eti 10 mandra girja ganagkil lingan mailinji Gamangtungan a ganugun asan Lopongtola lingan. Gamangtungan a ganugun asan tabme girja singan ganutulan deli. Gamangtungan a ganugun asan 35 mandra kudub ayam apsele bangsa anobling bara lingan swrpzdamlinji.

Bangsa anoblingan asan yante gamle Bar okij gorjanganji survey deti baranji apsele garberba manan Goalpara do Golagatha lingan. Tabme jangardanji a lanabaman apsele garberba Bhaoraguri lingan ateng mandranji Panuangban anurunganji asan. Girja singan a garutulan asan yante gamle Janongan hanangan deti kun apsele garberba manan Aunibari do Kumarbari lingan. Bar yante gamle bangsa anobling baranji anumengan batte gorjang banji lanuman deti kun apsele garberba.

### 16. Manipur

Brara Jannongan:335

Gamangtungan Ad'ong saninsenan de'eti 380 sing birindanji apsele 3 ompu dara kuna lingan sanayam janabanji anappaiyan deli. Gamangtungan a ganugun asan 2 mandra Girja lingan mainan hangleji. Kawkta a gorjang saring Rubina er-marid jangardan saring

tanandin deli bar anin nami sakiberan opungle daku. Gamangtungan a ganugun asan Kitungan a sanabyu beranji Jisun ahim lingan hangtabi gamle opungben asan dardilenten manan 45 gorjang lingan.

Utlou do Sabal Leika lingan yanti gamle bangsa anobling baranji apsele yante gamle sanangan ranin debin asan garberba. Ayenga a 15 mandranji derna paningba ganangkil bara lingan oskaidagi a dakunji a mandraji apsele garberbaji. Bangsa anabhananji yante gamle mandranji atemang lingan ganijtan debin asan garberba manan Nangpok do Moirang a gorjang lingan. Bangsa anobling baranji apsele garberba manan 335 gorjang taniyan deli asuyuman batte manarangan deti.

### 17. Tripura

**Brara Jannongan: 520**

Gamangtungan ad'ong sanisenan de'eti 13 mandra tabme mandrengnan abhanatenji asan manan Udaipur garda lingan. Gamangtungan a ganugun asan Bishu Laxmi paralysis kanalkalan saring sanamangan hangetin garberan bate. Gamangtungan ad'ong sanisenan de'eti 30 mandra dernan batte Jisun ad'ong ablumar hen gamle pingbaleji. Gamangtungan a ganugun asan ateng mandranji anumeng lingan dakuji bangsa anoblingan jaben asan gorjang lingan.

Ayengan a 52 mandra oskaidam dakuji Jisun amang dernan batte pingbale jaben asan aninji apsele garberbaji. Jangarda lingan manarangan hangben asan garberba manan Komiktor Para a gorjang lingan. Gamangtungan amang garberba yante gamle kudub yam lingan bangsa anobling baranji halin dakuten kun apsele garberba. Jackchara Kami a gorjang lingan yante gamle garadanan apsele Da'an, Korent, Tangoran hangteji kun apsele garberba.

### 18. Odisha – Ho, Santalinji

**Brara Jannongan:306**

Gamangtungan ad'ong saninsen an de'eti Sahi Bega a gorjang saring 22 mandra Jisun Ad'ong ablumar hen gamle dernan batte pingbaleji. Gamangtungan a ganugun asan Girja singan a sanurpzd ganangkil lingan ateng mandranji rukulinji manan Kundabhanga do School Sahi lingan. Gamangtungan Ad'ong saninsen an de'eti Kitungan a tanimyem lingan 8 mandra adong ranabdun deli. Gamangtungan a ganugun asan 7 gorjang lingan anumna garberan sanusun deli.

Ayengan a mandraji bangsa anoblingan asangim lingan dakuji aninji apsele garberbaji yanti gamle Jisun ad'ong galamben asan. Bangsa anoblingan anoskai baranji batte yante gamle 35 tabme bangsa anobling bara maranji batte – 175 gorjang lingan anardun debin asan garberba. 72 bangsa anobling bara maranji do sing birindanji yante gamle Ranaptin batte hanandraman detiji kun apsele garberbaji manan Ho, Santali gorjang lingan. Girja sing baranji anamtungan apsele garberba manan 5 gorjang lingan.

### 19. Odisha – Kandhamal

**Brara Jannongan:186**

Gamangtungan ad'ong saninsen an de'eti Jamjhiri a gorjang lingan bangsa anobling baranji lumben asan bangsa royongan hanangan delin. Gamangtungan a ganugun asan Baibol hangna ompun batte sanusun deli manan Barikumpa lingan. Tilakipada lingan a kristu maranji batte Girja singan gutulben asan janongan anoskai lingan dakuji. Gamangtungan a ganugun asan 8 mandra kristu maranji ampra girja ganangkil lingan mainan hangleji.

Ayengan a 15 mandranji oskaidam dakuji derna paningba ganangkilal apsele yante gamle ranaptin hangteji garberbaji. 10 Dangardanji apsele garberbaji yanti gamle Kui jatti

maranji atimang lingan bangsa anoblingan opungben asan ganudingan hangteji kun apsele garberbaji. 25 mandra bangsa anobling ganangkil lingan ardutajji kun apsele garberbaji manan Darada lingan yante gamle manarangan deti. Mandranji yante gamle Jangarda lingan manarangan hangteji kun apsele garberbaji.

## **20. Odisha – Paralakhemundi**

**Brara Jannongan: 629**

Gamangtungan ganugun de'eti Masalguda lingan 4 mandra adong Kitungan a berna batte ranabdun deli. Gamangtungan a ganugun asan Kristu maranji manarangan deti manan Arjunguda lingan. Gamangtungan ad'ong saninsenan de'eti 39 mandra bangsa anoblingan amdanglenji asan abmang tara lingan Manan Kindrimal lingan. Gamangtungan a ganugun asan bangsa anobling baranji asan sanangan ranin deli manan Khilapadar do Dephaguda lingan.

Ayengan a mandraji tabme dagi seekers anumeng soba lingan ardu laiji manan Hallam lingan aninji apsele garberbaji ynte gamle bangsa anoblingan galamteji. Girja sing baranji apsele garberbaji yante gamle hadab ayam lingan tanabkudan deben asan manan Dolaa do Pedaguda lingan. Borlendi do Singpur apsele garbeba Jisun batte anablun hangben asan. Madhu sabra do Indra Sabar sing birnda apsele garberba yante gamle Kristu tanimiyim lingan manarangan hangteji. Garberba.

## **21. Odisha – Sambalpur**

**Brara Jannongan: 154**

Gamangtungan ad'ong saninsenan de'eti 19 mandranji a pintun tanamadan delin asan seeker anumeng sobanji batte. Gamangtungan a ganugun asan 10 mandra tabme hanangan deli derna paningban batte. Gamangtungan adong saninsenan de'eti Khalipali lingan ateng manoi'han batte bangsa anobling bara lingan maina tanurdun hangleji bangsa anoblingan anamdangan atiki. Gamangtungan a ganugun asan Jangardan batte sanitan deli manan ompu dara kuna lingan.

Bangsa anobling bara mar Sdhu Charan do sing birندانji apsele garberba unji miyhum deti Kitungan asuyum taniyan passijan hangben asan omdile daku. Tabme Jangardanji yante gamle bangsa anoblingan batte lanabaman deti garberba Tingipali lingan. Tabme Kristu mara Rama Meher yante gamle asing birندانji adong Jisun amang urungle raptitai kun apsele garberba. Echhapur do Pampur lingan er-marid jangardan ranabangan deli yante gamle Jisun ahim lingan anamdungan deti kun apsele garberba.

## **22. Chhattisgarh – Raipur**

**Brara Jannongan:107**

Gamangtungan saninsenan de'eti Bजारंग ayengan a mandra anablun deli manan tanadai janabanji saring nami anin barji itsuman batte Kitungan a berna opungben asan oskaidam daku. Gamangtungan a ganugun asan tabme girja singan ranin deli manan Pathariya lingan bar kristu maranji bangsa anobling baranji asan ateng itsuman dakuji. 100 mandranji a banangsan asan Manelgij sanamang baranji lanuman deli manan Abhabpur lingan. Gamangtungan a ganugun asan L.E.G darakunan ranin deli manan 5 gorjang lingan. Kitungan ganugun de'eti.

Sarangarh Jilla lingan Bangsa anobling baranji asan yante gamle gorjanganji bar surven deti kun apsele garberba. 22 miyhum deti Ajay Chouhan asu lingan daku sanamangan asan garberba. Tabme bangsa anobling bara maranji Ravi do Ezhak bara darakuna lingan bangsa anobling baranji susuleji. Gupa maranji a soba Raipur lingan deti yante gamle anojorayan deti kun apsele garberba.

### 23. Chhattisgarh – Chamba

Brara Jannongan:228

35 gorjang lingan bangsa anobling baranji sanusun delin asan Kitungan ganugun de'eti. Gamangtungan a ganugun asan 11 mandra dernan batte Jisun Ahim lingan Ablu mar hen gamle pingbaleji. Gamangtungan ganugun de'eti Santosh Cancer asun saring sanamangan hangetin. Gamangtungan a ganugun asan mandranji Jisun ahim lingan pingbale anablu hangle ganangkul lingan manarangan deti.

Pintu apsele garberba kan mandran bangsa anoblingan a tanamder lingan daku yanti gamle Jisun adong galamte bangsa anoblingan batte garberba. Yante gamle girja ganangkulan sanusun deti manan Petha lingan kun apsele garberba. Kudub kristu sing birindanji apsele garberbaji yante gamle aninji a sakiberanji batte atalna maranji abyarjetinji kun apsele garberba. Ayengan a mandraji bangsa anoblingan amdangleji aninji yanti gamle bangsa ganadludan batte Jisun amang yertajji kun asan garberbaji.

### 24. Madhya Pradesh

Brara Jannongan:314

Gamangtungan sanisenan de'eti Dindori lingan mandranji bangsa anoblingberan amdangle itsumdagi dakuji Jisun adong jabin asan. Gamangtungan a ganugun asan 3 sing birindanji Kristu maranji a ganangkil ompu lingan maina tanurdu lingan dakuji. Gamangtungan sanisenan de'eti 4 sing birindanji Baibol hangna ompu lingan mailinji manan Nainpur lingan. Gamangtungan a ganugun asan Kitungan asuyum taniytiyan passijan hangleji 5 miyhum atiki.

Ayengan a mandraji bangsa anobling bara maranji Ramesh Maravi do Surendar adong asangemteji aninji adong garberbaji. Bagla girja ompun adong garberbatanuning lingan dakuji daihnan hangben asan. Bangsa anobling bara mar Parsad Lal tanangadan batte panaran hangetin barij kandar dong lingan tanulan do sanamangan debin asan garberba. Marid Jangardan a sanayaman batte yanti gamle 510 tabme gorjangan survey deti 2024 miyhum lingan bangsa anobling baranji apsele.

### 25. Gujarat – Ahmedabad

Brara Jannongan:248

Gamangtungan sanisenan de'eti Navapada lingan Talim harangnan sanusun deli 20 bangsa anobling maranji batte. Gamangtungan a ganugun asan bangsa anoblingan apsele sanangan ranin deli Rathwa Jatti maranji atimang Amreli a gorjang lingan. Gamangtungan Ad'ong sanisenan de'eti buhangan Johnson Ganava bangsa anobling baran lumben asan Mahisagar Jilla lingan royongan hangetin. Gamangtungan a ganugun asan 3 mandra Jisun ad'ong jaben asan oskaidam dakuji.

Garberba yante gamle anlenji arduben asan royongan hanangan deti ganabri royonganji batte kani 2024 miyhum lingan-70 bara maranji batte 350 tabme gorjang lingan. Baibol hangna ompunji apsele garberbaji 172 gorjang lingan daku yante gamle Girja Ganangkil ompun rapte deti kun apsele garberbaji. 460 mandranji apsele garberbaji derna pingba ganangkil lingan oskaina lingan dakuji yante gamle anojorayan deti kun apsele garberba. Bangsa anobling bara maranji yante gamle hanangan rapte deti er-ardu gorjanganji apsele garberba.

### 26. Gujarat – Dang

Brara Jannongan:110

Gamangtungan ad'ong Sanisenan de'eti gorjang lingan ateng mandranji manarangan deti uante a maneng lingan bangsa anoblingan 110 lanuman deti. Ayengan a 13 mandranji dernan batte pingbaleji Gamangtungan a ganugun asan. Gamangtungan



ganugun de'eti Girja singan gutull ben asan janongan hanangan delin asan manan Bibupada lingan manelgijan deli. Gamangtungan a ganugun asan 15 insalonji Tailoring hangnan amtungleji manan Ukalapani lingan.

Ayengan a 11 mandranji oskaidam dakuji dernan batte Jisun ad'ong pingbaben asan aninji apsele garberbaji. Girja sing baranji apsele garberba yante gamle anamtungan deti manan Hanumantpada do Maharadar lingan. Machibhai yante gamle tanadai janabanji saring tanandin deti kun apsele garberba. Kanda mal do Jamaniya a gorjang lingan yante gamle sanayaman hangteji kun apsele garberba.

## **27. Maharashtra**

**Brara Jannongan:440**

Gamangtungan ad'ong sanisenan de'eti Khusal Yetre sing birindan sanabyun batte bangsa anobling bara lingan handram dagi deli manan Pimpalgaon lingan. Gamangtungan a ganugun asan Sivnib gorjang lingan sanitan deli manan Vshal bangsa anoblingan amdangetin batte. Gamangtungan ganugun de'eti Sukdi lingan girja singan ganutulan delin asan. Gamangtungan a ganugun asan bangsa anobling bara maranji batte bo ansadagi ganangkilan lanuman deli.

Anumeng soban lumben asan royongan daku manan Pangan do Pachamouli lingan yante gamle anojorayan deti kun apsele garberba. Chandori lingan Girja ganangkilan sanusun apsele garberba. Devani gorjang lingan rubmang lanumanji asan garberba bangsa anobling baranji batte. Davanhipparga lingan adakun a kristu maranji batte yante gamle bangsa anoblingan toji toji garda lingan harte kun apsele garberba.

## **28. Telangana-Hyderabad**

**Brara Jannongan:244**

Gamangtungan ganugun de'eti Sandeep a sing lingan Kitungan asuyum taniyan passijan hangleji 6 miyhum atiki. Anin a skiberanji batte ateng mandranji Jisun amang lingan anurungan deli. Gamangtungan a ganugun asan 3 dangarda bangsa anobling baranji asan Jisun ahim lingan abmangod linaiji. Gamangtungan sanisenan de'eti 6 Baibol hangna ompun amdungle tiyaitinan asan. Gamangtungan a ganugun asan 8 mandra Jisun ad'ong Ablu mar hen gamle dernan batte pingbaleji bar Jisun ahim lingan sakiberan opungteji.

Mahaboobabad Jilla lingan 10 tabme gorjanganji apsele garberbaji kan gorjang lingan bangsa anobling bara maranji ad'ong omdile dakuji bangsa anoblingan amdangben asan. Yante gamle bangsa anobling bara maran batte girja singan gutulben asan janongan oskaile raptite kun apsele garberba 4 gorjang lingan. Kara logi garberba manan Godi, Koya, bar Telugu gorjang lingan yante gamle ganangkilan lumle anojorayan deti kun apsele garberba. Garberba 150 tabme mandranji Baibol hangna lingan mailinji yante gamle bangsa ganandludan hangle Jisun ad'ong jateji kun apsele garberbaji. Yambail gorjangan yate gamle gradanan apsele Da'an hangteji bar Medical sanayaman deti kun asan garberba.

## **29. Telangana-Hanmakonda**

**Brara Jannongan:147**

Gamangtungan ganugun de'eti Sandeep a sing lingan Kitungan asuyum taniyan passijan hangleji 6 miyhum atiki. Anin a skiberanji batte ateng mandranji Jisun amang lingan anurungan deli. Gamangtungan a ganugun asan 3 dangarda bangsa anobling baranji asan Jisun ahim lingan abmangod linaiji. Gamangtungan sanisenan de'eti 6

Baibol hangna ompun amdungle tiyaitinan asan. Gamangtungan a ganugun asan 8 mandra Jisun ad'ong Ablu mar hen gamle dernan batte pingbaleji bar Jisun ahim lingan sakiberan opungteji.

Mahaboobabad Jilla lingan 10 tabme gorjanganji apsele garberbaji kan gorjang lingan bangsa anobling bara maranji ad'ong omdile dakuji bangsa anoblingan amdangben asan. Yante gamle bangsa anobling bara maran batte girja singan gutulben asan janongan oskaile raptite kun appsele garberba 4 gorjang lingan. Kara logi garberba manan Godi, Koya, bar Telugu gorjang lingan yante gamle ganangkilan lumle anojorayan deti kun apsele garberba. Garberba 150 tabme mandranji Baibol hangna lingan mailinji yante gamle bangsa ganandludan hangle Jisun ad'ong jateji kun apsele garberbaji. Yambail gorjangan yate gamle garadanan apsele Da'an hangteji bar Medical sanayaman deti kun asan garberba.

### **30. Andhra Pradesh – Manyam Mandal**

**Brara Jannongan:1996**

Gamangtungan Jisu Kristun ad'ong sanisenan de'eti 24 mandra Jisun ad'ong dernan batte ablu mar hen gamle pingbaleji. Gamangtungan a ganugun asan 5 gorjang lingan bangsa anoblingan anopungan deli Suryanarayanpur a yar yar manengba lingan. Gamangtungan Ad'ong sanisenan de'eti 27 dangardanji tabme mandrengnan hangleji Dangarda anumeng sobanji batte. Gamangtungan a ganugun asan yagi dinna ansadagi ganangkilan lanuman deli manan Katragada lingan.

Gamangtungan amang garberba yante gamle ateng bangsa anobling bara maranji hanangan deti manan Navagam, do Chikalam saring. 10 Girja ompunji apsele garberbaji yante gamle Jangarda lingan ranadun hangteji Marid Jangardan a ranaptin batte Kitungan a berna lingan. K.Kamuduvlas a gorjang saring toij toij gorjang banji bangsa anoblingan anopungan deti kristu maranji batte kun apsele garberbaji. Ayengan a mandraji oskaidam dakuji Girja singan Gamangtungan ahim lingan swrpedle gannaben asan yante gamle anojorayan deti kun apsele garberba. Ayengan a 6 gorjang lingan Girja sing baranji halin daku yante gamle baranji tanabkudan deti kun apsele gareberba.

### **31. Karnataka**

**Brara Jannongan:207**

Durgamma Beerahali a gorjang saring er-marid jangardan saring tanandin deli. Gamangtungan ad'ong ganugun de'eti. Gamangtungan sanisenan de'eti 4 mandra girja ganangkil lingan mailinji. Gamangtungan a ganugun asan 10 mandra bangsa anoblingan amdangleji abmangtara Chikkachelluru lingan. Gamangtungan sanisenan de'eti 9 mandra dernan batte Jisun ad'ong ablu mar hen gamle pingbaleji bar kristu maranji ampara mailinji.

Bangsa anobling baramar yante gamle darakunan hangte kun apsele garberba Bullapura lingan. Garberba yante gamle derna pingba ganangkilan lanuman deti 7 gorjang lingan. Mubarak apsele garberba yante gamle er-marid jangardan saring tanandin deti kun apsele garberba. Bar sing birinda lingan yante gamle sanabyun deti kun apsele garberba.

## Jisun na Anabsamang mar-hen



Anlen Shepuamba a gorjang saring bar sing birinda henji orro bara batte mengnaben asan derna lenji daku. Jing hen radu baran lumte jannong lingan. Abumung arasudan batte jing ling hen tanangad dele bar tanurtuman asuijle! Anlen Kukhna jatti maranji a ompu saring bar sanagal maranji amang yerle. Bindo sanamanga er hanang.

Bangsa anobling maran Sonjibhai R Pawar gametin antate kuni lingan bo mandra satta daku Ahiman Jisu.

Butente kudub asu kanalkalanji sabngaijtebar kudub arasudanji arakadang lingan mandranji ate tamedle pangeten. Kuni lingan sanamangan daku Anin batte. Hen kuni hanang lingan tiyje lenai. Hen kuni a janardi lingan derlenai; abmang tara mandrengna ling hen. Hen garbernaben asan susulenai bangsa anobling maran batte Jisun ahim lingan hen tabme mandrengnan hanglai bar Jisun batte ranadun hanglai. Ugar ling hen Jisun ad'ong hanglai bar nami bangsa lingan daku dile dinna lingan. -*Hiruben Gavit, Gujarat*

## Jisun na Manrengna -hen



Hen ganijmadan batte janabanji sobin asan ranabangan delih. Hen abyardul tiyben asan manghen iteja adakuad. Hendaman batte jaru kinlung lingan ganalun delih.

Hen tanuldam hen batte barij tardangi dakulih bar tangkanji hangben asan dakuli hendaman batte.

Bindo asangen saring dungnaben asan ranapthien adkuad. Kudub bara lanumhenji batte ogandilai bangsa anoblingan batte Gamngtungan a bernan saring.

Hen kuni lingan susulenai janardi lingan derna lingan tanimyem lingan bar radu baranji batte kuni tnunjingan saring daijnan hanglai.

Hen ogandilai " Barasi maran anindaman batte manarangan dete" s'ing linglen sanitan deli bar dungdam da'aban ganuniban adelin a neban ambarij daku.

Ameng Kitungan Jisun a bernan batte tanandin a hanglai. Ayengan a mandraji oganditeji bar galamteji aninji tungherderdagi adeaji bindo tiki anabgugun detiji! -*Umesh Kumar, Uttar Pradesh*

## Kitungan Na Anablumar -hen



Bakurdi miyhum dele hen sanabyun er hanang dile miyhum lingan abhana damnaben asan bar hanagod linghen dile angaij lingan abojorayben asan kungdaijanji amang. Bindo aninji'odagi ade'ejji.

Kanalkal hen batte s'ing ling hen harle bar hen ogandilai kani kanalkalnji saring daijnan hangbenasan. Hen bangsa royongan hanglai amdangben asan sanayaman Ruangan saring yeraiten bar Jisun apele butente anlenji asan arakadang lingan karahidan hangeten.

Anlen janalangan a rabanglai ateng ayam anoal berlenji a dakulin ate Bhojpuri Bangsa anobling bara maran batte. Jarditen gamle, anlenji apele palidde deli manan anablulenji asan satta Jisun batte!

Anlen Jisun amangban a yerlai Anin ad'ong galamben asan. Kuni lingan Tanamadan daku, Tanandin daku bar sanabyun daku ugaran apele anin a timangban.

Anlen bangsa anobling bara maran ad'ong a sentai butente donglen bangsa anoblingan opunglenten Janatedagi janardiberan batte. Gamangtungan Ad'ong saninsen an de'eti. -*Kundan, Uttar Pradesh*

For private Circulation Only



NATIONAL TAMIL BELIEVERS CAMP, DHYANA-NICAYAM, HYDERABAD - 14-16, JAN. 2024



SCHOOLSAHI, ODISHA - 15.01.2024



SOINKHOLA PARA, TRIPURA - 28.01.24



HEMSUKIAPARA, TRIPURA - 15.01.24



KUNDABHANGA, ODISHA - 29.01.24



GODEVALASA, A.P. - 27.01.24



NORTH INDIA COORDINATORS CAMP, BHOPAL - 28-31, JAN. 2024

**VISHWA VANI SAMARPAN - SOURA LANGUAGE**

Printed and Published by P. Selvaraj on behalf of VISHWA VANI, a registered society ( Regn. No.17871 of 1987) and printed at CAXTON Offset Pvt. Ltd., 11-5-416/3, Red Hills, HYD-04. and published at 1-10-28/247, Anandapuram, ECIL Post, HYD-62.

## Jisun na Anabsamang mar-hen



Anlen Shepuamba a gorjang saring bar sing birinda henji orro bara batte mengnaben asan derna lenji daku. Jing hen radu baran lumte jannong lingan. Abumung arasudan batte jing ling hen tanangad dele bar tanurtuman asuijle! Anlen Kukhna jatti maranji a ompu saring bar sanagal maranji amang yerle. Bindo sanamanga er hanang.

Bangsa anobling maran Sonjibhai R Pawar gametin antate kuni lingan bo mandra satta daku Ahiman Jisu.

Butente kudub asu kanalkalanji sabngaijtebar kudub arasudanji arakadang lingan mandranji ate tamedle pangeten. Kuni lingan sanamangan daku Anin batte. Hen kuni hanang lingan tiyje lenai. Hen kuni a janardi lingan derlenai; abmang tara mandrengna ling hen. Hen garbernaben asan susulenai bangsa anobling maran batte Jisun ahim lingan hen tabme mandrengnan hanglai bar Jisun batte ranadun hanglai. Ugar ling hen Jisun ad'ong hanglai bar nami bangsa lingan daku dile dinna lingan. -*Hiruben Gavit, Gujarat*

## Jisun na Manrengna -hen



Hen ganijmadan batte janabanji sobin asan ranabangan delih. Hen abyardul tiyben asan manghen iteja adakuad. Hendaman batte jaru kinlung lingan ganalun delih.

Hen tanuldam hen batte barij tardangi dakulih bar tangkanji hangben asan dakuli hendaman batte.

Bindo asangen saring dungnaben asan ranaptihen adkuad. Kudub bara lanumhenji batte ogandilai bangsa anoblingan batte Gamngtungan a bernan saring.

Hen kuni lingan susulenai janardi lingan derna lingan tanimyem lingan bar radu baranji batte kuni tnunjingan saring daijnan hanglai.

Hen ogandilai " Barasi maran anindaman batte manarangan dete" s'ing linglen sanitan deli bar dungdam da'aban ganuniban adelin a neban ambarij daku.

Ameng Kitungan Jisun a bernan batte tanandin a hanglai. Ayengan a mandraji oganditeji bar galamteji aninji tungherderdagi adeaji bindo tiki anabgugun detiji! -*Umesh Kumar, Uttar Pradesh*

## Kitungan Na Anablumar -hen



Bakurdi miyhum dele hen sanabyun er hanang dile miyhum lingan abhana damnaben asan bar hanagod linghen dile angaij lingan abojorayben asan kungdaijanji amang. Bindo aninji'odagi ade'ejji.

Kanalkal hen batte s'ing ling hen harle bar hen ogandilai kani kanalkalnji saring daijnan hangbenasan. Hen bangsa royongan hanglai amdangben asan sanayaman Ruangan saring yeraiten bar Jisun apele butente anlenji asan arakadang lingan karahidan hangeten.

Anlen janalangan a rabanglai ateng ayam anoal berlenji a dakulin ate Bhojpuri Bangsa anobling bara maran batte. Jarditen gamle, anlenji apele palidde deli manan anablulenji asan satta Jisun batte!

Anlen Jisun amangban a yerlai Anin ad'ong galamben asan. Kuni lingan Tanamadan daku, Tanandin daku bar sanabyun daku ugaran apele anin a timangban.

Anlen bangsa anobling bara maran ad'ong a sentai butente donglen bangsa anoblingan opunglenten Janatedagi janardiberan batte. Gamangtungan Ad'ong saninsenana de'eti. -*Kundan, Uttar Pradesh*

For private Circulation Only



NATIONAL TAMIL BELIEVERS CAMP, DHYANA-NICAYAM, HYDERABAD - 14-16, JAN. 2024



SCHOOLSAHI, ODISHA - 15.01.2024



SOINKHOLA PARA, TRIPURA - 28.01.24



HEMSUKIAPARA, TRIPURA - 15.01.24



KUNDABHANGA, ODISHA - 29.01.24



GODEVALASA, A.P. - 27.01.24



NORTH INDIA COORDINATORS CAMP, BHOPAL - 28-31, JAN. 2024

**VISHWA VANI SAMARPAN - SOURA LANGUAGE**

Printed and Published by P. Selvaraj on behalf of VISHWA VANI, a registered society ( Regn. No.17871 of 1987) and printed at CAXTON Offset Pvt. Ltd., 11-5-416/3, Red Hills, HYD-04. and published at 1-10-28/247, Anandapuram, ECIL Post, HYD-62.